


書



綠

卷十一

桑林詩集

卷十二

霖雨詩集

卷十三

試拈詩集

卷十四

試拈詩集

卷十五

丙舍詩集

第十一

崇禎十年丁丑
月盡閏四月

丁丑春盡赴急徵稼軒竝列刊章少龍相從
草索渡淮而北赤地千里身雖罪人不忘吁
嗟閔雨之思遂名其詩曰桑林集

過清江浦遙寄故人

跨下橋邊又此行
赭衣白髮可憐生
班荆却喜無人問
刻木祇愁有吏迎
惜別飛花憎岸草
相留語鶯笑林鶯
多情依舊長淮水
流入清江伴
舫聲

漂母祠和何士龍

韓侯釣水遶城垣青史猶垂進食言人以千金
知老母天將一飯試王孫孤生書劒霑新淚逐
客簪纓感昔恩欲薦渚蘋何限恨寒鴉落日滿
祠門

黃河

都將銀漢變黃流也是天公錯一籌鵲駕但爲
終夕計鼉梁寧是濟川謀災來何用沈圭璧時
至那須辨馬牛飛昂出圖君莫詫清河白馬又
誰尤

俳體戲示士龍

四瀆已將三瀆過三春總是一春忙黃沙學傅
何郎粉赤汗從熏荀令香釜下馬通和餅熟棧
閒驢面比人長歸來準備江南話煖鋪深缸笑
幾場

次韻荅士龍二首

白首孤臣踐駭機天門夢斷翮猶飛覆蕉鹿訟
無榮辱芥羽雞場有是非扣角車前唯汝共觀
魚濠上與心違閨中春莫應相憶掩淚頻聽緩
緩歸

又次

蛇鬪龍爭共發機刺天毛羽正羣飛十州鑄鐵
入謀錯萬物爲銅大冶非作楫胥靡身故在刺
舟漁父意相違君看河上攤錢叟不犯風濤不
肯歸

清河道中三首

拍岸河流氣不平單車盡日遶河行帆檣矗立
遙天破波浪掀翻大地爭罩眼飛沙人面改撞
胃噩夢旅魂驚野田蔓草渾無賴斷送芳菲逐
處生

其二

銀鐺驅我太匆匆襍被囊衣客子同心似行枚
銜舌底身如釋米簑車中東還刺促看南斗西
笑惜騰向北風捫腹自嗟還自問不知若箇是
途窮

其三

慘澹郊原似霧冢洪河嚙岸馬嘶空粘天黑浪
非章相刮地黃塵是庾公柳樹病猶晞夏雨薺
花開亦向春風人閒榮落關何事野店殘陽一
閃紅

宿遷

枕畔車輪又一宵
荻簾土銼共蕭條
棧爭惡草驢言怒
炊仗殘通馬意驕
野集煙稀知罄盡
春田兆坼見龜焦
溺人強笑誰相問
莫以愆陽歎聖朝

郊城二首

村店無籌殺五更
棧驢齧暗相驚
蓬鬆旅鬢料風色
滴瀝愁腸量雨聲
催舞荒雞暗夜半
識塗老馬盼晨明
雲開日轉非吾事
也要殘春一路晴

其二

挹斗揚箕誤有名
捫參歷井信浮生
天垣貫索星文賤
人世胥靡性命輕
豺虎頻年銜尾過
馬驢終日竝頭行
岱宗顧我如衡嶽
盼蠻開雲報午晴

一歎示士龍

一歎依然竟隕霜
烏頭馬角事茫茫
及門弟子同關索
薄海僧徒共炷香
百口累人藏複壁
千金爲客掩壺漿
昭陵許哭無多淚
唐制有寃者要倩馮班慟一場

里中小馮生善哭

費縣道中三首

驅車入魯弔遺黎宗國相傳事可悲歌鳳有人
供放逐鬪雞無相繫安危申豐錦去鄰爭羨陽
虎弓還盜亦嗤唯有汶陽田下水至今流恨遶
鳧龜一雙示士讀

其二

費縣城邊紫翠重恰憑登頓看山容雲舒霧縠
浮千嶂雨濯煙綃出數峯石瀨咽沙流淺淺野
花眠草吐茸茸停車佇想東蒙客欲討蓴羹興
已慵

其三

闌珊心事怯餘春殘夢驚迴一欠伸病樹不禁
蛇在腹野花終倚草爲身櫪中馬老空知道爨
下車勞枉作薪當食爲君三歎息難將更僕話
窮塵

泉林

泗水之源出焉題曰子在川上處

泉林源泗水叢薄閔荒丘的礫翻空色縈迴貯
湫流道窮悲溲井物化感藏舟願解塵纓濯悠
然炤白頭

泗水二首

柳市縹煙麥起波江南樂事趁清和當風翠袖
穿花竝映水紅粧向晚多鸞識疏窻溫舊語鶯
憐別院選新歌情知好夢成殘夢也較車聲枕
畔過

其二

柳絮飛灰菜甲塵車中何處見殘春北來有鸞
如胡語南望無鷺比鴈臣渡淮以北絕不聞鷺
燕亦似作北音故以
歎泗水湫流長帶咽歷山遙黛正含嘖劔溪雲
樹漁莊水領略秋光要此身

早發次士龍韻

車輪鳴轆轤鈴鐸響丁東鄉夢殘燈外羈心魘
語中褐衣蒙早霧席帽泛春風偶梗休相笑漂
搖各斷蓬

再次

不愚浴殿北鈴索液池東莫道天方醉還期日
再中看桃宜令節嫁杏與春風歎息年芳逝飄
蕭兩鬢蓬

四月十一日登岱山五十韻

清晨上泰山下山未昏黑登覽興已賒驅車一
何疾我行渡泗水望岳心悚栗原野相却迎丘

陵莽奔逸胡然類削成未見表律萃停車迴馬
嶺凝望似堂密岱山勢自迴伏羣山各離立傲傑
矗數峯壘浪見沸澤偃蹇欲不朝顧眄疑旅揖
低徊成運眩登頓猶埒塞紆迴凌絕頂頽仰蕩
宵臆天去山不多雲與地爲一衆山斯在下九
點煙屑瑟鉅如牛眠冢細如蟻封埴散如狐綏
綏聚如羊解解弭伏象環衛奔走效羈繫傲傑
雖兀傲沒踝不及膝乃知文人尊兒孫敢匹敵
登登四十里十八盤乃畢山容濯深秀石狀鬪
詭特洞壑互排陷岡巒競迸逼穿地山根湧撐

天石笋出層峯腰帶雲遠嶂掌蔽日大冶無不
有神工故難詰琢爲研山姿縮放盆池質近松
辨薺峙遙樹紛禾櫛戍削衣低昂翻反袖欹仄
玲瓏月斧漏窈窕雲車匿屬連方帖妥颺去忽
剖副濃淡尺寸變向背一曠失領要苦煩紆追
逋恍迷惑何當信宿留攬采靈異悉坐看下垂
雲布滿兜羅色又看崇朝雨飛練挂千匹煙嵐
挾烘染雲海按蕩瀟籠拙賦家心極命畫史筆
逝將毀車輪豈獨戴臺笠茲游借刻晷身世兩
牽率每笑秉燭忙自歎乞火急是時天大旱山

枯石將泐渴游旣惺松閱雨彌快悒元君盛香
火盼蟹走郡國金錢佐軍儲羨餘潤私室神道
亦乘除青帝遂失職雀鼠穿帷帳風雨剝韋鞞
惜哉陰陽愆致此驕蹇極神心本天咫明禋在
國恤魯童舞僇僇齊偶啖唾唾天門開談蕩膚
寸雲豈息炆炆蟣蝨臣獨爲蒼生泣

春盡日次士龍韻

淒涼白髮黃塵裏祖道東皇又一巡暈碧裁紅
成故事落花中酒是前因繇來好別長禁客况
復窮途更泥人是我送春春送我把君詩句問

殘春

將抵德州遣問盧德水

十載栖遲汗簡青飛鴻漸羽故冥冥抱經有約
尋盧閣書牘何顏問杜亭窻下草深埋退筆床
頭花盡臥空鉞披帷想像人斯在試款衡門一
扣扃

齊河懷古四首

耿濟鎮

耿奔擊張步濟師齊河陽至今耿鎮水軍聲沸
湯湯歎息千年後荒城築阜昌

齊河城劉豫所築

晏城

采地遺者誰相國齊晏子千駟不匡君二桃能
殺士激彼梁丘生浮白為之起

高唐城

綿駒雖不存善歌表遺里君聽齊謳聲抗越清
濟水豈無梁甫吟何人為側耳

定慧寺

呂公榮公徒鐵衣佐龍興投戈返初服撒手歸
上乘麒麟可即圖龍像俱傳燈

師起調上於濟南募兵五千餘人所向有功
官都青軍司宗樂初辭返僧服與榮公相繼

坐化今寺藏二公
畫像呂公尤奇偉

早發定慧寺禹城道上逢茅山張鍊師

漏鼓晨鐘喚病魔僧窻殘夢未銷磨
三閒住桑下真成一宿過
量雀語誤人多騎驢却笑神仙客
倒載黃沙不奈何

德水送芍藥

藥闌花朵正紛披客舍憐君贈我時
紅粉誤攢頭恨去綠盤知芳菲
齊深憂實鼎遲莫作離騷香草看
楚臣腸斷是

將離

東壁樓懷德水

小樓殘日自昇平
茶竈煙消香篆更
訴盡春愁
雙鷺語喚迴午枕
一雞鳴中原氛祲
連玄菟下
界浮雲竝太清
撫檻欲招金馬客
夜深同候泰
階明

次韻酬德水見贈

蒼黃被急徵
性命落片紙
昔爲頭上巾
今爲足下履
感君逢迎意
纏綿入骨髓
炙眉忘艱辛
抗言論文史
半生歷坎陷
刺刺正坐此
逆人吐刺
芒愛我其疾
美辟如中風
走暫息聊復耳
慚無席上珍
視彼櫝中毀
志士思風雨
瞽史知星紀
矢詩敢遂歌
聊以復吾子

上牧齋先生

盧世漑

平生一寸心
結託數番紙
夢想凡幾年
今日奉約履
攝衽聆微言
徹骨透腦髓
方知有身世
方知有經史
曠觀古及今
懷抱盡於此
先生救世手
淵淵饒內美
伊呂伯仲閒
名位偶然耳
從不受人譽
何乃來人毀
讒夫卽高張
焉能亂天紀
風雨動魚龍
仁義動君子

謝德州張太守送酒

越吟憔悴著南冠
炙日熏風道路難
且向東方窮窶數
東方朔平人也
敢於安邑問猪肝
香翻乳酒傾雲液
油點槐淘瀉玉盤
從此人傳送臨賀
爲君鄭重一加餐

通州張太公壽讌詩十六韻其子主事文

輝知縣文燧來請

邦畿鄰魏闕家世本
留侯束髮輕榮進
齊眉篤好述絲綸
鸞掖出桃李鯉庭收
柳市眉良憮蘭香藥
可羞治盈新鑄炭
懷握舊傳鈞筵對樓
桑

樹杯添谷黍籌小紅
花競吐重碧酒新
芻桃熟將人試梨
消不外求長筵羅
易栗深院植安榴
人世腰纏鶴天恩
杖祝鳩易京堪避
世聖水可忘憂亥
字春秋小丁年齒
髮適星槎通漢渚
仙治滿神州北海
供椒繭平原置酒
郵二子一令益都一管
倉德州故有繭
裘平原酒之聯
燕歌徵戚里趙
瑟倚筇篻載詠
南山什賡歌迭獻
酬

代贈十六韻

別館新宮碧落連
星娥月姊自年年
錦章天上仍難報
機石人間可浪傳
搗藥兔還尋好伴
入

河蟾肯炤孤眠目成敢託波通語意感祇憑枕
作緣臉際芙蓉長自媚詩中芍藥倩他憐欲知
君面聊看鏡但憶郎家便數錢藥使歸身欣啞
謎鈞藏蓮子畏空拳明粧不省宵來卸好夢還
將睡去圓苦憶落花爲我伴生憎飛燕到誰邊
關情落索拋紅豆使性迷離拆翠鈿已分管絃
陪謝傳敢云條脫贈羊權雉羹斟酌期加飯烏
爪爬搔不用鞭緩唱深杯供竹葉斜行小字擘
花箋駐顏豈必餐雲母煖老終當種玉田報喜
金針新露夕懷人紈扇早涼天秋衾也逐征夫

遠莫是君歸在妾先

柳枝十首

花信樓前風暗吹紅攔橋外雨如絲一株顛顛
無人見肯與人閒綰別離

其二

離別經春又隔年搖青漾碧有誰怜春來羞共
東風語背却桃花獨自眠

其三

簇縷垂絲阿那姿風流種性會禁持樹旁空有
傳書使蝕葉成文好寄誰

其四
天生標格擅溫柔
小院曾攔蘸碧流
不是腰支長委地
怕隨紅杏出牆頭

其五
楊葉楊花撩亂時
半隨殘夢半游絲
可憐萬線千條在
但記征夫舊折枝

其六
嫁杏標梅不耐羞
嬌慵盡日倚粧樓
團圓解得東風意
判與兒郎打綉球

其七
莫將拋擲怨年華
也傍開花也落花
河畔青青比芳草
長隨蕩子到天涯

其八
玉樹瓊枝事杳冥
天榆月桂總精靈
莫欺楊柳溝泥種
也是天街一小星

其九
彎彎月掛柳梢頭
新葉如眉月似鈎
看取月圓明鏡照
展開眉葉萬重愁

其十
長養成陰自有期
飛花飛絮莫傷悲
楚江萍實

大如斗好是蟠桃結子時

荷花辭十首

南浦荷花覆白蘋採蓮歌斷曲翻新芙蓉菡萏
多名色不及荷花是可人

其二

十里蓮涇接館娃石城西畔是儂家一枝占斷
西湖種曾是西施舊采花

其三

菡萏芙蓉不較多蓮心蓮的本同科芙蓉頭上
原從草滿子饒他也姓荷

其四

月宮團桂樹婆娑化作峯頭十丈荷倒向蓮花
爲世界可知玉女是姮娥

其五

荷花的的水中央蕩子牽舟一水旁刺密荷稠
那得見迴船隔浦滿風香

其六

魚戲田田隔水知荷花不語自低垂團團碧葉
遮如蓋旋遊明珠打鴨兒

其七

嫩葢生紅恰試花卷荷纔展欲歛斜含嬌離立
誰堪倚自歛朱房對晚霞

其八

旭露朝霞慢試粧翠莖紫的半摧藏小蓮結子
偏憐早不比紅蕖正出房

其九

露集枝條玉不分如規碧葉動成紋藕身到底
終須折一片冰心付與君

其十

結實成蓮心自知分身化作藕千絲千絲未斷

終相偶交葉駢花一帶垂

德州送王鹿年

頻年遭患難道路與子俱有如墮枝鳥依此失
水魚子今捨我去置我於路隅譬彼瞽失相俵
俵何所如子行非無事爲掃我室廬慰我犀角
子衛我充棟書我有萬行淚附子衣裳裾爲我
拜北堂灑向舊倚閭

東壁樓簡程魯瞻

兩膝隨身不自謀一茅蓋頂更何求
兀君突兀千閒屋置我差我百尺樓
北海開車欣後載西

園促坐阻清游他時得遂平原飲傾蓋相看笑
白頭

爲魯瞻題畫二首

卻扇含顰歛翠蛾閑看侍女教鸚哥可憐紅嘴
聰明鳥怕殺雕籠是網羅
右美人調鸚鵡圖
施浪帆風去莫疑高人乘興卽前期人閒何限
迴舟處得似山陰夜雪時

右山陰返櫂圖

欲別東樓去四首

閏四月望日發德州將歸死於司敗吏卒促
迫僕馬惶遽居此樓浹旬一旦別去又不獲
與主人執手欲哭欲泣皆所不可賦欲別東
樓去四章題於樓之前榮壁上庶幾他日解
網生還要德水魯瞻痛飲此樓屬而和之
欲別東樓去棲遲念浹旬槐陰亭早夏鶯語殫
餘春酒爲開嘗好書從借看新他時與朋好風
雨話斯晨

其二

欲別東樓去行車起暗塵忘腰衣帶緩數日鬢

毛新小劫看今雨中
年別故人可知分手路
昔夢自相因

其三

欲別東樓去孤城已暮
笳可憐羈縻客仍作賈
胡家賣餅經寒食吹簫
過落花還愁鈎黨急踪
跡到天涯

其四

欲別東樓去東樓卽我
廬扶疎槐作陰啁哳鳥
相於墻屋如初至門庭
自掃除分留題壁句漫
憑待蟲魚

早發雄縣次稼軒韻

竝著南冠亦偶然何妨
酌醴復烹鮮孤花自綴
三春後病樹猶居萬木
前失路馬行枯麥裏颺
空塵起大車邊戴盆莫
怪頻瞻望也是城南尺
五天

其二

畿南赤縣夕烽連邊鄙
會蒙胡虜憐元結詩序云賊攻永
州破郡不犯此州邊鄙而退豈 積賦蕭條仍禹
力能制敵蓋蒙其傷憐而已 貢桑林焦灼又湯年
作霖誰副興雲望繁露空
繙致雨篇何日南山理
蕪穢荷鋤同種豆其田

牧齋初學集卷第十二

熱齋初學集卷第十二

霖雨詩集

起丁丑五月盡一年

閏四月二十五日下刑部獄尚書侍郎暨臺
諫郎署相見者五十餘人久旱次日大雨劉
敬仲司空迎謂曰此霖雨之徵也余笑曰安
知不曰亨弘羊天乃雨乎因以霖雨名其詩
云

送姚方伯 永濟 復官

解網殊恩應禱求褰帷重許鎮方州旄頭角動
催庚癸索口星移向斗牛竹馬舊童迎去憶桑

林新雨拂行輶高牙大纛尋嘗事還為東南借
一籌

洮河石硯歌為劉君作兼呈宋中丞祖舜

君不見本朝輿圖軼秦漢洮河今為國西岸肅
慎楛矢恒來庭丁零牛羊可併案洮河之研玉
比堅踰羌絕塞來幽燕廣廈細旃曾貯此枹罕
西頃在眼前白山小奴游魂久傳烽漸近登津
口高麗繭紙阻職貢鼉磯島石煩戍守老夫捧
硯自躊躇拂拭還君三歎餘豈知飛檄磨厓手
牘背相隨獄吏書

送丘俞二將軍

佩印曾經擁節麾荷戈今復戴恩私卽看夏雨
平反日又是秋風選將時索虜共驚新壁壘島
夷還識舊旌旗俞故名將大猷之子白頭未試猿公術短
後猶堪作健兒

贈樓桑公子

元老登陴萬虜奔郎君援筆卽戎軒金張但是
傳貂葉郭李何曾出相門遼薊夷情如指掌幽
并俠少半銜恩雲中夜獵歸旌卷月白樓桑古
樹村

獄中雜詩三十首

支撐劔舌與槍唇坐臥風輪又火輪不作中山
長醉客除非絳市再蘇人赭衣苴履非吾病厚
地高天剩此身老去頭銜更何有從今祇合號
罷民

其二

夜柝驚呼夢亦便晝應如夜夜如年都將永日
銷長繫只倚孤魂伴獨眠晝獄脚跟還有地覆
盆頭上不多天此中未悟逍遙理枉讀南華第
一篇

其三

遷史空留貨殖文竹刑葦籍正紛紛國中安得
魯男子天下無如玉長君黠鼠晝巡添伴侶蒼
蠅夜息斷知聞斗牛側畔干將氣早晚光芒定
屬雲

燕人鄭師玄知天象云去年冬貫索
星明主有大人入獄明公當之矣

其四

衣冠桔槔此相遭狴犴中間小市朝敢祖詩書
輕法律權祧孔孟事臯陶獄神廟相傳為臯陶圜扉地竝
綸扉隘鈴柝聲如鈴索遙夢將樓舩渡皮島欲
從詹尹問何妖

其五

通籍刊章目互除恰如朝市有盈虛誰教長者
為方笥更便刑徒習隸書悼往雞羣看斷尾謀
新鼠穴夢乘車閑中簡點人間事憂患祇應識
字初

其六

紛紛燕獄上書人 天語連章戒瀆陳凡上疏
奉旨曰豈有孤臣淹棘木漫勞 溫旨下楓
不得賣陳宸傷心尚點絲綸簿炙手還逢丞相嗔猶有憂
時心未已雞鳴風雨歎斯晨

其七

貫城西畔鐵城幽紂絕陰宮抵夢游側席深居
皆虎尾負墻離立總牛頭風傳暗柝千般恨月
炤圓狴別樣愁謾道繁霜飛六月葭沉灰冷轉
悠悠

其八

聖世孤生忍自裁夏臺頌繫比春臺深慙黃霸
傳經至傳給事右君胡行人雪田皆來執經敢趣朱游和藥來加
劔空餘槃水炤持刀偏畏鼓聲催書生何用憐
文季投匭於今厭草

其九

訓狐白日向人呼
罔兩中宵問影孤
有室端堪容兩膝
無牀何處認雙趺
月窺圓戶如愁繫
風送更籌似逐逋
唯有羈人甘索處
塊然窮鳥觸籠隅

其十

驕陽初伏正乘權
窟室薰蒸劇可憐
爍石只應園土爛
流金不見鐵圍穿
西天却受炎方苦
指西曹為西天大地都愁劫火然
獨有老夫誇矍鑠
更思曳足看飛鳶

其十一

三韓殘破似遼西
竝海緣邊盡鼓鼙
東國已非箕子國
高驪今作下句驪
中華未必憂寒齒
羣虜何當悔噬臍
莫倚居庸三路險
請封函谷一丸泥
逆如吞併高麗奪我

其十二

漫漫長夜旦何期
無復平分辨四時
苦雨淒風差耐得
薄寒小病亦相宜
天荒地老餘園土
鬼爛神焦見積屍
坐斷波吒真地獄
不繇羅刹不慈悲

其十三

四序司刑盡爽鳩何須葉落始悲秋
心情好處渾中惡風月佳時不抵愁
送去紙錢新鬼市汲來井水伏屍流
八寒陰獄長如此縱有陽春到此休

其十四

此中不省是何方地絕天通限堵墻
玄鳥避巢無四序獄中無燕燭龍迴
駕少三光枯骸每與人爭坐白晝頻
看鬼亂行唯有六時鐘鼓發燈殘夢
斷也徬徨

其十五

台星落落夜寥寥咫尺垣墻貫口遙
大有羯奴侵上國可無司馬相
中朝廷登近日金甌易夢卜頻年
沙路囂綸閣園扉多故事與君分
墀祭臯陶入獄祭臯陶見范滂傳本朝小說亦載入閣祭臯陶事

其十六

易水波騰碣石翻修羅一掌障乾坤
知交踈踏憂連坐僮僕倉皇擬叫閻
美酒經時澆漢獄愁腸終夜繞吳門
却憐痛定仍思痛病悖頻將白首捫

其十七

霜慘雲繁鎖鐵扉
茶香酒事都非
南冠潦倒憐烏帽
獄卒踉蹌認白衣
人比籬花何許瘦
身如朔鴈幾時歸
遙知四海登高會
多指燕山酹夕暉

其十八

傲道嚴更護棘叢
果然牢獄不通風
安知獄卒尊如此
始信吾生固有窮
白日可能迴地底
綠章何處達天中
斗魁直下天牢在
午夜依然繞帝宮

其十九

熒熒宿火焰黃昏
撼撼寒風打席門
每借愁端支永夜
都憑噩夢返羈魂
功名過眼篝燈在
世事從頭倒枕論
睡起慵騰扶白首
可知羅網是君恩

其二十

漁灣蟹舍互寅緣
萬樹寒梅罨畫船
嫩綠放檐依候足
竊紅出水受風偏
鈿車每惜飛花地
簾閣尤宜小雨天
夢斷江南好春事
與君獄底話神仙

神仙

與劉敬仲談江南風景因次其韻

其二十一

黑獄沉沉白日昏嚴更况復警重門難尋伴侶
憑形影欲達音書托嚮言見晉書五行志晷短蕭條逢
滅劫夢長迢遞歸魂亦知遙夜相思處燈燼
香消半席溫

其二十二

廿年齊聽景陽鐘投老衣冠此地逢祝去詛來
如有恨單行卻立豈為恭獄中巷道狹隘相駢
頭會聚攢蜂觸接跡經過折蟻封卻笑凍蠅思
附驥穴窻何日得從容

其二十三

欲隨短景斷愁腸可耐嚴更又許長謝客蠨蛸
收冷戶依人蟋蟀守空牀耗磨膏火三分漏領
略寒威一番去霜傳語司空休起舞鳴雞啼鴈
總堪傷

其二十四

經年獄底阻艱危狂鳥投籠馬就羈尊者夢中
曾示現十五年前夢多生為金馬道人與老僧
海上已先知丙子歲吳門王生謁普作有老僧
難行也蓬蒿環堵彈琴處方丈毗耶宴坐時儒

行宗風都會得信知調伏是便宜

其二十五

半椽恰受向隅人矮屋還憎墊角中穴紙聲疎
魚網舊啄門響密雀羅新床多臥筆應知懶架
少繙書始覺貧最是催詩并問字每於清夜惱
比鄰

其二十六

蕭辰嚴獄應彫枯風急周廬警夕呼身老蟬衣
穿尔雅道窮蛛網閔陰符寒冰著面生稜角饑
火迴腸轉轆轤遙夜歌聲正三闋始知回也是

吾徒夜聞傳右君歌聲

其二十七

六街鼓息五更頭葦席單衣萬事休已見騎驢
臨獨柳曾看走馬向長楸革膠一夜離肝腎牙
齒何年長觸髅東閣免歸西市死夕陽亭下總
悠悠

其二十八

良友冥冥恨夜臺寡妻稚子尺書來平生何限
彈冠意後死空餘挂劔哀千載汗青終有日十
年血碧未成灰白頭老淚西窻下寂寞封題一

鴈回

臨邑故司馬夫人命其子走書相信

其二十九

溪柳冥濛比雪寒竹堂月舫思漫漫

柳溪竹堂皆先世第

宅也好花筆秃珊瑚架惡草匙荒雲母盤斟雉羹

調誰進御持螯酒熟且加餐可憐警枕英雄老

夢斷湘靈瑟未闌

皆吾家譜謀故事

其三十

皇覽揆余初度時松醪春酒菊花枝千金稱壽

慚親串一物全生荷

聖慈老眼畫圖行聚米

虛窻料敵坐圍棋成都桑樹衡山芋剔盡寒燈

夜話遲

九月二十六日劉尚書諸公釀酒為壽

送馬巽倩歸會稽

諸公紛紛趨貫城子出我入如踐更子罷呼囚

我趣上恰如除目刊姓名多子僂行相問訊執

手顧視心怛怛天地為籠逝何所欲哭欲泣皆

不成是時當路正炙手同文之獄初煩興端禮

門前舊鐫刻格天閣下新題評羅鉗吉網平錯

拒子虛烏有相枝撐杯裡無蛇我所悉水中有

蟹那能平和藥趣來手欲戰然灰被溺目敢瞪

閉口捕舌豈容遁排山壓卵孰與爭骸骨已分

填牢戶。鬼夢猶想歸柴荆。聖主聰明察庶獄。
小臣愚闇偷殘生。竈火撲滅乞兒散。社樹斫伐
妖狐驚。台階中。圻卷舌。曲斗閒。索口還。崢嶸與
子開口方一笑。抗手卽路難爲情。我爲老寡坐
幽閉。子如稚婦初歸寧。蓬孌婀娜。不相似。搥床
撫枕俱屏營。原澤蕭蕭鴻鴈少。江河惓惓多甲
兵。登山臨水何處所。送子目斷秋蓬征。東中風
土良不惡。弋釣採藥聊意行。逸少故有濟世志。
安石肯忘東山盟。西陵驛樓過。騁望東土人士
多。逢迎牘背何繇具。書尺因風哽咽遙。寄聲琅

璫白首尚無恙。爲我炷香謝聖明。

題杏花宮人圖爲傅右君

閒撥銅鏡看淚痕。春風取次到長門。監宮傳報
天顏喜。紅杏花開滿禁垣。

題畫二首爲傅右君

策星夜動王良馬。車騎紛紛滿郊野。幽并好馬
胡兒騎。迴鞭蹴踏長城下。今年雲中開馬市。百
金一馬胡人喜。金繒壓鞍革胴酒。齊唱吳歌度
遼水。老髯奚官立道傍。佇看烙印黯悲傷。莫輕
此馬爲胡種。曾秣天閑十二坊。

東奴掠我馬汰其疲駑者以予

西虜西虜卽以入市
太僕寺烙印宛然

右牧馬圖

南山白額毛蟲祖掉尾磨牙踞林莽
嚙人不肯避豪賢狡獸輕禽敢余侮
壯士髮植風蕭騷身掠虎落禽咆哮
應弦飲羽目一曠拉押雨血摧風毛
倒載爛班出叢薄山虞高眠野樵樂
寄言尋斧休放縱還爲深山惜藜藿

右射虎圖

李將軍國樑挽詞二首

飛將名空在封侯事忍論死爲明國
法生敢負

君恩棄市沙場血吞胡虜鬼
魂古來推轂者先與鑿凶門

其二

未見東奴滅其如西市何
國殤應會鼓虞殯已聞歌
獨石邊墻在中朝敘蔭多
誰懸藁街首酹酒向銅駝

咏雪三十韻

凜凜園中暮漣漣雪下遲
雲同天黯淡霰集地離披
肅氣金方積巖威玉律宜
臺烏紛淺色林棘稍皴枝
帶殺來鳩署分寒出鳳池
猶嫌霜稜

去薄肯放日華滋嘉石堆盈矩園扉穴刺規刀
山尖矗矗鈴索墜纍纍病栢封枯削孤篁壓倒
垂牛頭噴變赤鵠面苦藏鰲厚集俄成陣輕飛
故薄惟酸風助饕虐凍雨聚淋瀝清濁容霑灑
乾坤任剝削彌漫巾地網簾頓駕空篩粉飾都
無隙恢張詎有涯菊花何太苦柳絮恐非時虎
穴誠難滿狐踪或暫夷漏壺冥旦晦岸谷混高
早半塞亡羊徑平填問馬岐橫空真跋扈失路
亦迷離溷廁那會避污泥總未差如何瓊玖質
翻作糞洩資瑩訝瑤臺碎清嗟玉尺墮何當依

瑣闥重與集累思繞徑行防滑穿簾坐苦危聽
窻分歎噫將策試扶持悶想陪鯁酒閑搜合開
詩槎枿生肺腑皎潔見鬚眉屯甲冷毛蝟封侯
惜手龜老夫堪一噓臥憶蔡州師

雪夜次劉敬仲韻

冷壁寒燈焰欲收卅年身計一狐裘雪花似掌
難遮恨風力如刀不斷愁鳶攫高樓仍拉摺鼠
爭深穴正啁啾殘年大有拚身處美酒盈船共
拍浮

贈潞安孫道人詩并序

道人往游新安却病起死其効如神約友人程
孟陽訪余於虞山而不果余復官赴闕從新城
王司馬沁水孫司農問道人在所二公許爲余
延致之亦不果今年聞余有逮繫之禍重繭千
里問余於請室道故悲今相向歎息且約候余
南還策蹇追隨共了還丹大事余感其意作是
歌以贈之并以訂其行焉

道人昔踏天都峯倒吸黃海食芙蓉道人今居
太行脊手捫天井煮白石今年訪我南冠囚霜
風裂面雪覆頭墜馬折腰臥旅店十日不食寒

無裘古來神仙多奇鷲英雄迴首人間事放驪
老將青城客椎龍少年倉海使君今已作愚谷
叟肝膽輪困尚如斗蹇驢摺紙著巾箱鐵彈如
風藏腦後君不見新城司馬氣食虎八十邊庭
撫驕虜又不見沁水尚書磊落人顧盼霜稜起
眉宇昔年執手禁城闐閣道周廬旦復晨沁水
每憂當路犬新城欲購解飛人

余舉王莽傳答
之一笑而止

王司馬詢余欲
購解飛人殺虜

幽討二公笑我太早計擲却金蓮想火棗十載
推移陵谷中可憐猿鶴與沙蟲宣雲屬虜填遼

水澤潞知交，酹朔風。我得幽囚，豈非幸。尚有殘
生坐智井，耳豁依然箭。著癡頭童，恰似頸生癭。
羊羔酒熟歲云暮，我心不留君。且駐君如朔鴈，
我越鳥相將會。逐南枝去，虞山亦是一仙山。丹
井銀筒紫翠閒，結宇平臨兩湖水。朝飛丹鶴莫
呼還。

次韻劉敬仲寒夜六首

寂寂寒廬，弔影孤咄。嗟何計復彫枯，心如抱杵。
頻春碓身似投驍，未入壺。憔悴移時，枯樹賦淒
涼。繞屋北風圖長吟，小飲猶堪樂。愁坐書空定
不須。

其二

小窻颯拉過，歸鴉凍口街。寒陣不譁悶，取青編
占木稼。閑梳白髮鬪霜華，差池梁燕恒辭社。落
薄巢鳩不置家，漫道雪飛如柳絮。絮可隨離夢到
天涯。

其三

尚有乾坤容傲兀，可無環堵置琴樽。望衡對宇
躬耕地，流水青山獨樂園。零雨故應悲在野，停
雲何必歎同昏。縞衣夢斷梅千樹，月落參橫與

晤言

其四

故山松桂傍人閒，不出林泉不閉關。
綠浪水迴新竹逕，紅欄橋繞舊漁灣。
穿雲臥石何曾鬧，抹月批風也未閑。
有日隣僧共扶老，緣溪略約試梅還。

其五

皮島傳烽數夜驚，綠林銅馬苦縱橫。
憐才可但旌當轍，使過終須赦絕纓。
急繕橐街懸雜種，更營京觀待長鯨。
至尊自定金湯計，作頌休誇

統萬城

恭聞

城落句

聖駕閱漫記

其六

結蘭延佇自幽幽，解佩何當怨蹇修。
騏驥生難逃，係繼鯨鯢死不爲。
吞鈎人間有賦難，名別天上無方可寄愁。
投老王官尋二士，築亭吾亦記休休。

再次敬仲韻十二首

白髮盈頭不耐刪，無才老子刺痴頑。
摩娑明鏡看生面，吟咀殘書理舊顏。
愧我勞人殊草草，輸他柔者自閒閒。
江南路在春明外，落日飛鴻山

外山

其二

不知何罪畫衣冠肯信眉於眼下安路入藕絲
行偈側身藏針孔坐艱難穴中烏鼠眠方穩水
底魚龍臥亦寒祇恐清宵又成夢幾迴撫枕到
更闌

其三

四壁霜華促曙光中腸結軫重增傷涉江楚頌
無甘橘故室吳羹有稻梁逆水雙魚多撥刺退
風六鷁更迴翔劇怜世事兼身事咫尺殘燈意

渺茫

其四

誰將瓶缶餉虛空墻壁依然與我同生計烏枝
依曉月世情馬耳過東風粧樓鶯語當春半禪
榻花殘正酒中雪窖冰山無不可與君朝夕對
芳叢

其五

風輪轉地劫爲塵猶喜皇天剩此身顧影自歌
將進酒窮冬還賦惜餘春端居有疾憂非鬼空
谷無聊喜似人比屋商聲出金石可知吾道未

爲貧

其六

長安也向日邊看矮屋雞棲仰面難
窻雪可令長夜旦壺冰豈爲一人寒
蟣肝無復堪砧几魚尾何曾戀竹竿
北叟南翁居接戶始知憂患果無端

其七

鶴蓋成陰柳市頭金張趙李互經繇
鄒陽下獄悲金鑠陸賈逢時歎石浮
浮石沉木語見新語莫以鵠雛償腐鼠
好將鴻羽換沙鷗江東舊隱西湖畔數

折溪橋一宛丘

其八

交疏窻閣暗傷悲腸底車輪攬夢思
滿鏡新粧留半面堆奩濃黛約雙眉
雪深椽燭攤書夜酒罷銀缸擁髻時
歸日胡麻正堪飯更須量畝種神芝

其九

心情蕭瑟稱初冬晝懶逢人夢亦慵
日夕雞埭愁土室歲時豚柵羨村農
絡頭是處皆牛馬假足何人比駟螭
紫栢聲聞都未了法堂依舊五

更鐘

紫栢老人坐化獄中有偈云柝聲未續鈴聲續誰是聲兮誰是聞却憶法堂鍾鼓候

其十

局趣真成轅下駒敢云世難恨為儒紛紛戎馬
羞稱老落落乾坤自覺孤雉雒有媒逢弩鏃鹿
生無命繫苞厨朝來盥醜臨青鏡他日何慚魯
衛徒

其十一

丙舍經營拂水陽齋心筮易得歸藏漏春岸柳
迴殘綠破臘江梅發古香鴻鴈計周謀稻黍鷓

鷓枝穩稱飛翔耦耕重訂高人約一段茶窠百

本桑

孟陽詩云何時鉏破東臯雨一段茶窠百本桑

其十二

每頌新詩可樂饑連墻却喜竝圓扉焚膏東壁
分餘炤曝背西榮共夕暉落落比鄰如置社紛
紛朋好欲忘歸亦知昔夢聊相似銅輦秋衾與
願違

續次敬仲韻四首有序

余在請室與敬仲司空比屋而居昏夜得句扣
門索和僮僕相嘲曰乞火乎索米乎敬仲每屬

和輒出意表余告之曰不量彼已輕兵挑戰勇
而無剛屢爲宿將所困天道後起者勝非獨戰
之罪也願公執螯弧先登僕謹厲兵秣馬以待
敬仲默默不應越數日忽出詩二十二首波騰
泉湧首尾爛然燒燈呵硯次第和之已而笑曰
敬仲之默而不應者示怯以誘我堅壁以老我
也已而連章累紙絡繹見示者重兵以壓我驟
出以窘我也敬仲於致師之法則巧矣黃池之
役昏而戒令雞鳴而壓晉軍王親執枹鼓三軍
譁鉦以振旅聲動天地吳可謂毒彥矣雖然盛

氣盡銳掩人不備固未可謂堂堂正正之師也
余不知兵法不勒部曲免胄大呼獨身搏戰雖
未能斬將褰旗視晉師之大駭不出周軍飭壘
則固有閒矣自今以往交綏而退偃旗息鼓以
避敬仲之顏行敬仲又將曰是其目動而言肆
乎當更用何法以肄我也丁丑十月十六日
跛足爭教欲上天筆床茶竈夢菰煙白蟬舊得
藏身訣黃妳新繙却老編爾雅蟲魚休辨鼠離
騷香草只宜荃丹鉛點勘紛成訟漏轉燈欹月
正圓

其二

偷得微生萬事慵
灰飛緹室候初冬
畢箕風雨難憑准
杓鑿方圓費彌縫
北郭先生生已老
東家夫子子爲恭
濁醪麤飯吾年事
莫以山林羨鼎鐘

其三

寒空雨雪正霏霏
枯坐西窗歎舉肥
園土冰深知地降
窮冬水涸與天違
屨能適足何須截
帕可蒙頭不解飛
莫向崦嵫悲晼晚
懸車猶足攬餘暉

其四

夜赤漫天亘曉暎
關心象緯未堪論
兔知霜降先營窟
蟲爲苗蕃早蝕根
壁上畫龍成底事
夢中案鹿竟誰冤
圓狴大有乾坤在
司寐無勞報夕昏

生日詩三首

孫吏部

昌齡

百年胡不樂斗酒
且相於莫歎山公啓
今爲城旦書林風傳
舊嘯窻雪映新居
零雨將爲別題詩
料子如

倪戶部

嘉慶

輓餉紆雙管籌邊轉寸腸風霜諳下吏冰雪見
清郎却掃韋編淨清齋梵筴香看君仍仰屋憂
國意何長

劉司空

榮嗣

湛璧難遮害塞莢幸告功若爲秦獄吏來議漢
司空河伯憂方大波臣論自公憑將尊酒意一
問緯蕭翁

送何士龍南歸兼簡盧紫房一百十韻

崇禎聖天子帝德邁陶唐疇咨若余采共咬亂

紀綱鈎黨窮部牒告訐登巖郎羣小競趣走翁
若中風狂峨峨格天閣沉沉偃月堂聚族謀旦
晚鎖閤算昏黃手繕女奴跡足摩青史牀諷指
變鹿馬蜚語沸蜩蟬牢修旣告變朱竝復上章
納言敢封駁投匭任披猖伊余退廢士杜門事
耕桑十年守環堵一朝鎖銀鐫天威赫震電門
戶破蒼黃詔紙疾若飛官吏什欲僵有母殯四
載淒風吹畫荒有兒生九齡讀書未盈箱賓客
烏獸散親族憂以瘁或有彊近者懼累遺禍殃
目笑復手笑堅坐看戲場或有猙獰者黠鼠而

貪狼毀室謀取子壞垣隳我床
椰榆反皮面謠詠騰誹謗
唯有負傭流弛擔語盡傷
唯有龐眉叟戟手呼彼蒼
市人爲罷市僧院各炷香
我心鄙兒女刺刺問東裝
暮持襪被出詰朝抵金閭
門生與朋舊蠶涌來四方
執手語切切流襟淚浪浪
惜我儻從弱念我道路長
或云權倖門刺客如飛蝗
穴頸不見血探頭入奚囊
或云盤飧內鳩董寘稻梁
七著一不慎墳裂屠肺腸
誰與警昏夜誰與衛露霜
誰與扶跋蹇誰與分助勦
何生奮袖起雲也行所當
闔門置新婦問寢辭

高堂典衣買書劍首路何慨慷
是時馮使君

元賜

送我臨京江浙將解符印從我
俱存亡敬子執

高節再拜舉壺觴江流怒飛立
三山擺雷碾白

日忽西匿青天爲低昂行行度
淮水登頓相扶

將弔古漂母廟祈靈岱宗陽杜
亭賢主人

盧德水家

有杜亭寄館仍異棖不憚開車載
不難復壁藏窺

戶無停屨追踪多飲章歸死赴
司敗垂頭就桁

楊洵洵同文獄剗肌生痂瘍共
莊籍口語曾史

主盜臧百死無一免引義自激
昂囑累皮與肉

堅忍枝蕪榜多謝老頭顱旦暮
虎穴葬何生夜

草疏奮欲排帝閭黯淡蚊撲紙傾歎蚓成行殘
燈焰明滅房心吐寒芒祖宗牖惚恍天心鑒明
明眉山摘牙牌分宜放鈴罔執彼三屍蟲打殺
銅駝傍孤臣獲更生朝市喜相慶吁嗟禍福交
誰能保故嘗與會附蕭傅長終叛呂防何以見
魯衛徒然痛陳臧歎子一逢掖眇小少不颺乘
鎖乞收李舉幡請留陽擬子於何蕃譜謀誠有
光孟冬家書來念母心不遑有憂食三歎矧乃
情與翔星言卷衣被別我歸故鄉我欲繫子駒
顧視心悵悵子行急師難子歸慰母望丹青或

可渝此義永不爽我欲送子去鐵門限堵墻圍
土無尺水何以當河壑我欲與子訣有如瞽失
相駢蛩一相背嚙負徒仿佯旋思獄急日痛愈
撫鉅創炙手勢轉熱彌天網高張叫閻遠萬里
引刀恥自戕和藥趣朱游呼囚到王章黑暗牢
獄苦炎蒸三伏燬矮柵棲鵝鴨糞壤轉蛄蜣臥
熏腐齒臭渴飲伏屍漿夜夜入針孔朝朝坐劒
鋒此日吾與爾志壹氣益強高論窮結繩和歌
出宮商人生如嗜味患難宜飽嘗阨陳良亦樂
在莒安可忘道遠兵甲阻歲暮雨雪雩單行寡

命侶蹇驢艱服箱冰堅埽狐踪雪深埋鹿迹禽
獸猶躡躡子行慎跌踢我行亦不遠歸心急鵠
鷄介恃 聖明主數日離火湯縱使荷戈及終
然反菰蔣買舟具笊箸結庵依枕柳矯志厲桑
榆與子共縹緲學詩辨四始識字探三倉頻年
苦病患學殖日以荒我欲師甯戚秉燭代日光
勿復慕富貴時世難頡頏引鏡看頭目豈是鼠
與麀勿復憂貧賤順逆隨牛羊譬如死牢戶誰
以軀命償拂水有丙舍青山抱長廊老桂長新
枝江梅發古香君歸持此詩灑埽揭東廂解鞍

慈杜亭先以告紫房

渭南梁生爲余寫真題二絕句
顛悴南冠冰雪晨天庭黃色自生春憑君摹寫
胥靡樣可是商家夢裏人

其二

畫得漁翁貌不肥春愁鶴髮正依稀君家渭水
南頭住爲我平添舊釣磯

趙璧

趙璧連城貴蘭花有國香猶堪傳脂粉三十侍
中郎

中丞送陳生崑良南歸

席帽疲驢問牖城風饗雪虐淚縱橫夜闌秉燭
知何地酒罷扶床感再生只有寒燈隨我住且
將歸夢伴君行棘林漸解彌天網道路悠悠莫
愴情

寄許文玉

敢謂前賢畏後生紀羣交誼古人情家庭實有
晨昏助鄉里虛傳月旦評貫酒悲歌憐北寺明
燈布席想南榮啼猿唳鶴君休歎并與嚶鳴作
友聲

寄侯豫瞻督學江西

水鑑清時吏部郎持衡專得典文章濯腸篆籀
吞江水炫目蛟龍矚斗芒勸俗蒸嘗先兩廟南

康郎兩忠臣廟採風詞翰繼三王停車五乳峯前院爲

我重拈一瓣香憨山大師葬廬

華州郭胤伯過訪

君是郭林宗衣冠見慕同偶然來朔雪相對感
流風舊論城南在新圖冀北空巖更憐促別愁
坐燭花紅

五芳井歌

丙子之秋虜再入旁午軍書刺閨急獨石邊牆
一夜隳赤縣黃圖少完邑定興小邑大如斗登
陴死爲朝廷守羊馬城前礮火飛蝦蟇車上雷
聲吼肉薄登城踏積屍麗譙漂血巷流脂狼藉
滿城忠義鬼骨撐骸拒知爲誰君不見奉嘗鹿
大夫奮髯嚼齒詈羯奴峨冠整衣抗白刃至今
衫袖血模糊又不見范家五芳井婦姑母女同
素纓俄頃芳魂斷輓轡千古寒泉見形影胡兵
宵遁三輔清乳燕連窠枝半傾大開明堂論爵
賞惟籌廟算皆公卿朝家彝典有倫次先策功
勳後節義金貂石卵如等閑愍綸綽楔非容易
奉嘗碧血埋荒丘五芳井水空悠悠尚書不肯
判紙尾詞臣何處書詞頭吁嗟乎忠臣烈女心
赤苦冤魄猶思埽胡虜人間金盃幸無恙井底
銀瓶何足數老夫觸事淚滂沱偏塞沈瀾一放
歌此身不共奴酋死忍死幽囚可奈何

張將軍

全昌

挽詞二首

醜虜游魂在雄邊宿將稀將軍今又沒部曲竟
何依恨不沙場死還從馬革歸可憐臯某復猶
用舊征衣

其二

赤血真堪灑丹書未肯刊死填牢戶易生拔賊
營難不汗逾三日無錢買一棺蕭蕭廣柳出易
水正風寒

戲題萬戶部小像

萬一目偏盲偏頭人
故督師世德之子

目送歸鴻故自難傳神正向此中看荊州恰好
添飛白子夏何妨戴小冠公子秋風思北渚孤
臣落日望長安籌邊蕩寇傳家事屈指沙陀舊
將壇

若活一百年

三春赴追捕皇皇喪家狗入夏禁牢獄兀兀困
械杻仰屋棲雞埒負墻坐土偶欲行蹙其足欲
言啗其口朝飧棘喉飯夕飲攢眉酒憂來頻擗
胃悸甚輒捧首領嘗難管腰卯或不保酉如此
一歲生可抵一日否陰獄強過活鬼趣預消受
歲月良亦多此歲何必有六十甲子中譬如闕
丁丑若活一百年只算九十九
如此過兩年

兀坐牢戶中日長苦迢遰四季皆慘悽六時自
鉗鈇三伏有煎熬八寒無代替有日天蒼涼無

風氣陰曠晷短方偃息夜永又吟嚙墻屋鼠啣
啾床第鬼排擠生憎日輪出長患天門閉矛頭
豈容浙戶限何當憇遙遙度一日當以一歲計
暫看杯度別瞥見銅人製三百八十日強半彭
祖世如此過兩年便算八百歲甲子中警吹
昔我年十七
昔我年十七鼓篋游博士文章吐陸離衿帶垂
旖旎朝英啓夕秀粲若嫩花榮壯盛迫婚宦憂
患自茲始荏苒四十載隻身攢譽毀羅網高於
天性命薄於紙皇天可憐我如禾秋稊稊健如

犢上樹壯若駒未齒今年五十六從頭自經紀
餘年爲再生故我如已死判將四十年捐付東
流水天道周而復明年十七耳

次韻荅潘朗士員外投贈

物論喧呶混豨苓將車盡日歎冥冥誰思灼艾
醫龍病但解堆鹽刻虎形減死蔡邕仍續史踰
冬劉向又傳經莫憐幽仄論垂釣貫索中間有
客星

其二

圓扉地北限天南只似雲堂未放叅一夜烏頭

虛變白三生鴻爪誤精藍小兒未許呼中令上
客真成解左驂宋玉可能傳帝筮修門容易向
江潭

新阡八景詩

并序

拂水回龍

南條之龍萬里度江自沙山而香山而虞山結
爲縣治東爲馬鞍山其中枝繇拂水巖蜿蜒弭
伏落脉於此故曰拂水回龍

虞山南戒一枝來騰踊龍身萬里迴奔向馬鞍
鱗爪去點成烏目眼睛開

虞山一名烏目山

含珠四海

濡泉壤銜燭千年炤夜臺長灑天河降時雨噓
雲膚寸起風雷

湖田舞鶴

尚湖之臯溝渚回復登山睇視儼如鶴舞弄吭
奮翮正向新阡父老有龜去鶴來之讖斯當之
矣故曰湖田舞鶴

乳水神臯接墓田仙禽遺蛻正依然梳翎彷彿
飄蘆雪閣脰依微印渚煙華表月明吭竝引丹
丘雲白影相連在陰夜旦占鳴和鳳舞休論五
百年

石城開幃

拂水巖之西厓石削成雉堞樓櫓形狀備具所謂石城也列屏列幃尊嚴聳起阡之主山也故曰石城開幃

石城峯下起佳城百仞丹厓見削成錯列垣墻天市近縈迴閣道帝車行雲開雉堞曾樓曉日落旌旗萬馬迎御望朝山爭矗立叅差簪笏似天平

箭闕朝宗

陽山箭闕相望百里而遙插立天外如向如拱

以圭景之法取之不失秒忽所謂真朝特來也故曰箭闕朝宗

百里陽山拱墓門歆雲吐景候朝昏羣峯離立兒孫秀大石中央几案尊箭闕風生旅矢報郊臺月出火城繁陽山有吳王拜郊臺憑高窮覽南條勢江漢朝宗爲汝論

沓石叅天

三沓石與石城諸峯錯峙沓石虛崦拂水懸流其上又曰三台石亦主山之侍從也故曰沓石叅天

拂水高巖近斗魁下臨沓石倚崔嵬漏穿嵐彩
晴飛雨噴薄泉流蟄起雷嶺駐龍車雲滃鬱峯
邀蟾駕月低迴綠章擬奏三階事午夜懸厓禮
上台

曾湖浴日

西湖一曰尚湖師尚父垂釣處也彌望環帶繚
如周垣水遶雲從日月出入此明堂之巨觀也
故曰曾湖浴日
浴日晴波漾六時丹淵若木影參差馮夷鼓趣
羲和馭尚父湖通潮汐池蕩洗蟄頤消薄蝕養
成烏羽作明離掛弓尚許清遼海欲向扶桑借
一枝

團桂天香

桂叢有小閣斥爲隧道八樹蒼蒼與松楸竝列
余少嘗夢臥月宮炤徹肌骨視其扁曰團桂閣
之所取名也故曰團桂天香

八桂團團霜露叢夢回禁扁映新宮三秋落子
金波裏一夜飄香玉魄中月斧自能修窈窕冰
輪端合炤青葱姮娥不惜分靈藥長發新枝助
化工

紫藤衣錦

老藤連卷託根墻下穿穴面勢用爲指南三四
月閒紫花相繆炤曜室密真吾家錦溪中物也
故曰紫藤衣錦
溪藤迴伏類牛眠布萼飛英綺樹連落落松楸
如有喜紛紛羅蔓媿高懸天清羽葆施丹彩日
煖流蘇覆玉煙應笑婆留老孫子還將錦綉裹
山川

山莊八景詩

有序

錦峯晴曉

嚴文靖公之祖墓今爲阡之左沙其傍有錦峯
書院去山莊一牛鳴地畫船蕭鼓游人絡繹而
三春尤盛

錦峯雲物近平泉烏榜紅欄咽畫船寵柳嬌花
新節序探珠拾翠小神仙明粧影奪山頭樹急
管聲翻水底天語燕正忙鶯又囀莫辭中酒落
花前

香山晚翠

香山一名顧山去山莊三十餘里江上諸山皆
橫屬於山莊之西而香山爲近虞山來龍處也

今又爲護山

夕陽樓畔坐簾櫳橫抹香山暮靄濃江上餘霞
拖半紫雲頭落日逗殘紅秋原桑柘千村影春
社牛羊一笛風西崦人家未昏黑席門燈火候
歸翁

春流觀瀑

山泉縣流自三沓石下垂奔注山莊匯爲巨礫
今旋折爲阡之界水遇風捍勒逆激而上則所
謂拂水也

拂水縣流萬壑連空山一夜響飛泉奔爲疋練
垂三沓挽作銀河向九天風急蛟龍看噴灑月
明琴筑聽潺湲老農未辦爲霖手抱甕朝來省
灌田

秋原耦耕

山堂之名耦耕爲余與孟陽結隱於此也今改
築於墓田之左仍揭其額以招孟陽

罷亞風吹百頃香秋原正面耦耕堂宿田爲我
鉏根莠卒歲輸他穫稻梁黃犢烏犍經國具水
車秧馬救時方輟耕斗酒還相勞耳熱休歌種
豆章

水閣雲嵐

秋水閣負山面湖山莊實經始於此今茲丙舍
盡改舊觀獨此閣巋然如故

月觀風亭夜半舟依然簾額夕陽樓江邊水寨
餘荒壘天際郊臺沒古丘梯几山容分向背凭
欄雲物變春秋釣磯只在漁灣畔閒看晴湖下
白鷗

月堤煙柳

墓之前有堤回抱折如肉環彎如弓月士女絡
繹嬉游如燈枝之走馬花柳蒙茸蔽虧口張帷

暮人呼爲小蘇堤

月堤人竝大堤游墜粉飄香不斷頭最是桃花
能爛熳可憐楊柳正風流歌鶯隊隊勾何滿舞
鴈雙雙趁莫愁簾閣瑣窻應倦倚紅闌橋外月
如鈎

梅圃谿堂

秋水閣之後老梅數十株古幹蚪繆香雪浮動
今築堂以臨之左右有長廊修竹小橋石礪皆
梅之館宇也

梅花村落傍漁莊寂歷繁英占草堂雀啅寒煙

翻略約鶴窺素豔繞廊過墻月亞疎枝影度
水風含別礪香傳語綠堤桃李樹好將穠麗報
年芳

酒樓花信

酒樓直山莊之東平田逶迤晴湖蕩漾北牖直
拂水巖寸人豆馬叅錯山椒紅粧翠袖移動簾
額月堤酒樓此吾山莊之勝與衆共之者也
花厭入高樓酒泛上危登樓共賦豔陽詩人間
容易催花信天上分明掛酒旗中酒心情寒食
候看花伴侶好春時穠桃正倚新楊柳橫笛朱

補英

歲暮懷

松栝藏門數畝宮闕耕堂並兩衰翁更無生計
千頭橘尚有殘生半樹桐堆積新愁黃葉雨耗
磨舊事白楊風天南地北相思處約略寒燈一
燼紅

除夜示楊郎之易是應山忠烈公長子

斗闌十載動衣冠
京華尚旅愁爲問敵
淹邱舍還如乞食
白馬誰子赤
身未提何處

搖頭

文齋初學集卷第十三

試拈詩集

起十一年戊寅正月盡七月

獄漸解頌繫待放五月二十四日以火災肆赦遂得出東坡蒙恩責授詩云却對酒杯渾是夢試拈詩筆已如神故以試拈名集聊用志喜

戊寅元日偶讀史記戲書紙尾

夢迴旭日射窻明遷史才繙午箭更笑殺蕭何與周勃可將獄吏換公卿

其二

牘背千金獄始明吹簫織薄可憐生北軍左袒
倉皇日七尺爭如冒絮輕

其三

絳侯繫急漫嗟吁又見工官坐亞夫父子將兵
俱百萬敢從獄吏鼓隴胡

其四

漢家爭道孝文明左右臨朝問亦輕絳灌但知
讒賈誼可思流汗愧陳平

其五

秦時刀筆漢三章械繫歸來兩鬢霜聞道青門

方會客種瓜五色曜朝陽

其六

南鄰有客醉呼盧笑指圓狴作酒壚愧我不如
曹相國後園張飲應歌呼

華山廟碑歌題華州郭胤伯所藏西嶽華

山廟碑

關中汲古有二士郭髯趙岫俱嵯峨

趙岫字子函 嵯字子

集錄金石著
石墨鐫華

伊余南冠繫請室攤書晝臥如中

魔郭生示我華山碑欲比七發捐沉疴展碑撫
卷忽起坐再三嘆息仍摩挲桓靈之際文頗盛

六經刻石正繆譌開陽門外講堂畔車輛觀寫
肩相摩鴻都學生競蟲鳥宣陵孝子羣鶴鵝石
渠白虎事已遠皇義篇成世則那此碑傳自延
素載石經未立先鐫磨丈人行可逼秦相一飯
禮本先光和郭香香察未遑辨洪适云東漢循
王莽之禁人無
二名郭香察書者察注他人之書
爾小歐陽以為郭香察所書非也但見濃點兼
纖波鋒刃屈折陷鐵石斲巖高下連巖嵯古來
書佐擅筆妙後代學士徒口呿久嗟石跌毀鼎
負却喜紙本纏蛟蛇墨莊舊物落髯手如出周
鼎獲晉犧身領僮奴雜裝治手與心眼爭煩接

靈偃相帙巧純緣史明牙籤細刮磋

惠靈偃史
明郭氏僮

也收藏定可厭鄴架鑒賞况復窮虞戈我昔遣

祭入太學肅拜石鼓拂白科依稀二百七十字

維鯁貫柳存無多晴窻歸櫺古則卷

家藏石鼓
文是趙古

則按節自誦昌黎歌去年登岱訪古蹟開元八

分半鬻蠶俗書刊落許公頌爛班漫漶餘蝓蝸

風霜兵火恣殘蝕此本疑有神護訶聖世文章

就燔熄珠囊儒雅失網羅儻書不顧經若典破

體豈論隸與蝌兔園邨老議軒頡乳臭兒子評

丘軻踳駁指日還見斗蠶凌祀海寧先河少小

亦思略識字沉淪俗學悲嗚唳况聞中原戰羣
盜盜竊名字紛么麼搜金剔玉殫屋壁崩崖焚
闕傾山河汲冢書門徧烽燧祈年响嶮難經過
每憐耆舊委榛莽誰集金石凌坡陀郭髯連蹇
趙岫死老夫頭白空嗟哦還碑梯几意愴恍髯
手髯乎柰爾何

松談閣印史歌爲郭胤伯作

六書繆篆用摹刻大者符璽細印章崩崖古隧
取次出鏤金琢玉爭弃臧關中郭髯最好古十
年收討盈篋箱部居州亂作譜牒編次細帙盛

縹囊璀璨丹砂炤蟲鳥錯互金璫堆琳琅攷正
職官本二史貫穿訓故窮凡將竊取正用史家
法豈玩小物塗朱黃憶昔先朝席豐豫符瑞
紛沓徵禎祥河清鳳見屢奏賀玉璽又報來臨
漳先帝親御文華門制詔臣下風四方千官
鶴列瞻負宸衝牙雙瑀聲鏗鏘中官屹立當御
座插冠貂尾加金璫紫泥封圻青囊解金銀賸
組開輝煌臨軒手持四寸璽俯示陞城周兩旁
槃龍紐螭弄掌握衫袖炤燭回虹光侍臣代奉
傳國寶殿中不用尚玉郎鴻臚傳制百僚賀文

曰受命壽永昌朝罷君臣咸燕喜南面竝進南山觴豈知瑞應不虛見中興天以授我皇郭君此書精且良曷不首勒玉璽圖訪問禮官摹尚方如服有冕網有網蠅頭細字注幾行吾詩附璽垂久長命曰印史非夸張春秋之義微而彰
人日嗟何日題詩憶草堂容顏獄吏惜時序老夫傷好事如花少愁心竝柳長不知分勝侶若箇話蕭郎

茗上吳子德輿次東坡獄中寄字由韻作
丁丑紀聞詩六首蓋悲余之逮繫而喜其獄之漸解也感而和之亦如其前後之次
銀鐺影裏見殘春悵恨登朝未殺身禍邁隱章知漢法行逢贈策感秦人途窮漫浪謫山鬼獄急倉皇禮嶽神金馬多生餘諍論欲臨流水證前因

其二

酷日酸風竝慘悽路長人極馬頭低孤身豈合投豺虎三物何當詛犬雞婉變更無臨市妾顛

狂猶有送行妻蒼茫汶泗交流地薄暮祇疑湘
沅西

其三

隕霜猶自望回春斗極誰收趙壹身已分殘生
餘有幾更將窮命乞何人市朝到處逢魑魅狂
狴中閒仗鬼神不信古來鉤黨事刊章錄牒正
相因

其四

八寒陰獄夏淒淒破壁殘燈白首低一夜霜天
愁唳鶴五更風雨悔鳴雞捐生聶政今無母先

死王章尚有妻准擬圖形屈原廟墓門何用刻
征西

其五

刀頭劔首度冬春欲殺何當有百身信到憐君
猶作客詩成知我尚爲人經繙北斗禳妖祲歌
闕南薰禮獄神如此纍臣無不可經年頌繫亦
何因

其六

餘年吟賞莫淒淒水閣玲瓏磻戶低茅屋每棲
春社燕山邨嘗報午時雞蓬頭豈必慙兒子染

髮祇應媚小妻歸去臨風謝知己扁舟應在五
湖西

做元微之何處生春早二十首

何處生春早春生美目中凝愁成淥水流笑與
光風微眇防眉覺會波託鏡通不堪朱碧思含
睇向芳叢

其二

何處生春早春生巧笑中開顏鶯睨晚失喜柳
惺惚蕙葉分多碧桃花破小紅如臯君肯御翳
雉候薰風

其三

何處生春早春生眉黛中笑能舒柳簇顰欲瑣
蘭叢秀色描偏淺愁痕掃不空劇憐粧鏡畔便
面又東風

其四

何處生春早春生鬢髮中柳眠全約略花妥半
鬢髮髻重和雲櫛梳輕向月攏更衣恩寵在搔
首恨飛蓬

其五

何處生春早春生靨輔中含嬌頻送態薄怒乍

舒紅膩理停蘭澤流光轉蕙風施朱與著粉評
泊任墻東

其六

何處生春早春生好口中含桃欺齒白編貝逗
唇紅房露清歌引幽蘭絮語通晝長頻咳嚏錯
莫喚雕籠

其七

何處生春早春生皓腕中含情向機杼抱影守
去房櫳峭倩寒葱削溫柔稚荀籠自憐工織素
纖指訴流風

其八

何處生春早春生素足中鳥交會滅燭屣跼不
禁風草惹裙腰綠蓮移屐齒紅刀頭嗟未見新
月似鞋弓

其九

何處生春早春生睡起中蘭心方的的柳眼正
濛濛寬弱渾難定身蘇旋欲融不如還昵枕殘
夢在房櫳

其十

何處生春早春生新浴中煙凝腰柳碧雨注靨

桃紅脂澤流香煖
鉛華濺水融
竊窺猶未得
况復與君同

其十一

何處生春早春生翠袖中
憑闌寒食雨却扇杏花風
掩抑縈飛絮低迴數落紅
遠山看未足延佇畫廊東

其十二

何處生春早春生羅帶中
輕塵看出水促步想當風
錯互袿襖飾禁持
袷服紅薄裝誰解得雜珮正叢叢

其十三

何處生春早春生窮袴中
明燈知護惜闇夢記惺惚
密意繁多帶驚魂託守宮
殷勤問啼鳥花信幾枝紅

其十四

何處生春早春生錦被中
芳香留半臂蘭露泛熏籠
一夜穠花發五更啼鳥空
生憎唐畫史只爲獨眠工

其十五

何處生春早春生寶鏡中
黛眉分鬪翠花靨互

呈紅炤罷愁相妬粧成訝許同巡簷聽鵲喜雲
鬢欲新攏

其十六

何處生春早春生角枕中梢頭花簇簇拂鬢錦
叢叢面澤承權裏唇脂竝口融可如郎臂好轉
側任西東

其十七

何處生春早春生刺繡中停鍼花竝發紉線鳥
相蒙密樹鋪重碧斜陽緣斷紅流黃慙久晦刀
尺爲誰工

其十八

何處生春早春生簾幙中參差依蠟燭幕歷張
輕風鷺子能嗔妾楊花會惱公衫前復扇後閒
殺畫橋東

其十九

何處生春早春生小院中梨花能駐月蕙草欲
沈風拂水臨粧鏡香山薄綺攏不愁桃杏盡堦
藥又翻紅

其二十

何處生春早春生畫舫中花迎千嶂碧柳罨小

橋紅溪女憐新霽菱歌愛晚風西施舊明月偏
炤五湖東

書四靈詩集

語近意不遠骨癯髓亦枯誰云賈島佛終是
家奴

戲書梅花集句詩

本朝沈行童琥
集各三百餘首

褐衣那得綴天吳折鐵精鏐共一鑪要與梅花
添火伴差排何遜配林逋

春夜讀漢書寄南海陳侍郎

殘書讀罷夜潭潭坐見辰星過劔函文帝自能

分代北賈生空復策淮南曲江羽扇何須嘆東
市朝衣更不堪且學袁絲能日飲牖城瘴海共

沈酣

題王孟端雙松圖為稼軒

落落長身對儼然撐雲臥壑竝千年叢生荆棘
何須問却怕柔藤蔓草纏

上元後二日聞諸公貶謫之作偶作

黃金臺畔夕陽紅衰草叢殘郭隗宮應是上林
春未足蕭蕭落葉滿東風

其二

無花無酒落燈天粥冷灰寒似禁煙我自中風
人暴病口喏目眙枉相憐

送傅給事

元初

歸晉安

客路桃花春水生都門祖帳藹新晴鑪香袖染
晨暉重袞職身違午夢輕青瑣洞門棲乳燕碧
梧高樹隱啼鶯金臺折贈新楊柳可似南中橘
柚榮

送劉宮諭

若宰

奉詔覲省

詔許詞臣覲北堂桃花春水帶恩光承歡每說
天顏喜愛日遙聽禁漏長膝下錦袍供戲綵手

中色線補垂裳六宮正茂珩璜訓早晚肩輿內
殿旁

贈夏童子端哥

雲間夏彝仲之子

端郎信不同非我欲求蒙背誦隨人詰身書等
厥躬倒懷嘗論日信口欲生風燈盞調聲病棋
枰喻國工若令酬 聖主便可壓羣公不見軒
轅后天師稱小童

反風行

二月十日忽陰曠刮風吹沙暗天地長安市上
少人行司寇徒行來下吏司寇叮嚀顧屬吏老

臣自失明主意老臣從此入請室凡百靖共
敬爾位焚香泥首拜臯陶獄門訣別咸流涕君
不見天王聖明古無二雲開日霽須臾事明
朝片紙召復位天乃反風亦容易

送僧游峨眉

劔外徵兵羽檄忙傳烽午夜炤瞿塘雙峨大有
閒人在坐斷千林看佛光

偕劉司空過應侍御小飲酒閒與來吏部
訂西陵之游

但遇招邀卽勝游莫將春日殢春愁紅塵蔽榻
還過應紫陌看花况值劉炤眼緋桃驚屋角開
顏綠醕熨眉頭前期共有西陵在露酒尊羨正
可求

贈胡泌水

甲第軒車互却迎萬人如海隱王城五侯席上
支頤坐丞相門前掉臂行突兀高樓看鼠墜嵯
峨老表算狸烹談天欲杜毘耶口午夜燃燈禮
淨名

送曲周路侍御之官中州路曾抗疏爲余
伸雪牽連謫官

臺栢空餘一院陰清時珥筆正如林諍臣豈爲
移官慮明主安知護法心客路孤花如我在
天涯芳草爲君深梁園自古風流地顛顛休爲
逐客吟

其二

舉網謀成嘆彼驕抗章投劾荷清朝青衫去國
君恩重白首全生物論昭海內灰心論碩果班
行指口戒川椒與君更有前期在汗簡牽連未
寂寥

題宋徽宗杏花村圖

宜春小苑春風香宣和闕殿春晝長帝所神霄
換新誥江南花石催頭網至尊盤礴自游藝宛
是前身畫師製歲時婚嫁杏花村桑麻雞犬桃
源世杏花村中花冥冥紘干山雀羣飛鳴巾車
挈篋去何所無乃負擔趨青城君不見杏花寒
食錢塘路鬼燐燈檠風雨暮麥飯何人澆一盃
孤臣哭斷冬青樹

夢與李長蘅談詩長蘅口誦一絕句嘆其
清婉有味云是湖州董伯念登第後有寄
作也覺而記之

舊巢雙燕到依倚風入疎窻燭淚肥短雨輕寒
催曉夢夢中渾未著朝衣

徐娘歌

徐孃二十絕代無當場一曲千明珠小妹鳳生
恰三七輕粧薄悅雙雙出肩摩擔壓篙櫓橫半
塘水沸山隄平清歌緩舞廣場寂千人石上無
人聲風流徐郎字夢雨徐于詩互見前卷一見蒐銷足
不舉油壁青驄竝載歸連枝共命交相許多情
多病轉堪憐最是清明寒食天楊柳風前行藥
坐海棠樹下對花眠相送却回凡幾度暗別偷

啼更無數玳重叮嚀囑歌扇護惜頻煩寄窮絃
離筵我賦送春詩更與新翻柳絮詞津逮軒中
低唱夜初平石下踏歌時徐郎笑嚔還相向在
旁惟爾曾知狀長將皎日留誓盟縱及黃泉肯
相忘豈知人世不相於共命拋離連理虛三秋
司馬纏綿病一紙蕭娘決絕書小樓窻前齊女
墓婁江卽是天河路空餘白骨裏秋衾拌爲紅
顏卽朝露淒涼此事十餘春取次沉吟淚滿巾
白楊荒草知何處况復嬌花帶酒人燕山糧艘
高於屋鶯梢燕乳樓船腹將軍組練白差差小

婦榴裙紅簇簇五日蒲榴正舉杯有人玉帳寄
聲來因知河上凌波女曾向江頭行雨回殷勤
慰問南冠客鬢髮新添幾莖白聊搏角黍祝團
圓更炙王餘勉餐食白頭殘客重咨嗟舊雨新
愁恨似麻已分歌殘吾谷樹更堪哭損馬塍花
十年一夢如宿昔往事如風豈堪摘小鳳公然
作阿婆夢雨荒庵更第宅我囚君嫁不爭多
瑁璩心情可奈何禁城暮雨瀟瀟夕還想吳孃一
曲歌

有感寄侯繕部

設羅門巷省誼譚公叔文成每自嗟謂朱公叔絕交論
對影攢頭如縮蝟向人張口似神鴉養成叢棘
終爲刺鋤過芳蘭可作花歎息要離墳畔土他
年真欲累侯芭

題大鳥圖

五月二十四日出獄爲居停主人題

漫道昆明有劫灰蒲陶苜蓿至今栽不知此日
乘槎客誰見條支大鳥來

送詹葉二御史赴南臺

本朝風紀出留臺况復臨軒御遣來攬轡風
生新諫草之官霜肅舊宮槐采恩高闕千年在

烽火西陵一夕迴

吳志楊都賦注曰孫權時合暮舉火西陵鼓三竟達吳郡

南月出衣冠猶在眼綠章先許奏堦台

其二

帝遣雄班重鎬京一臺二妙遂先鳴旁求容易

招胥靡拔茹頻煩說彙征碩果摘餘嗟老圃豆

萁落盡笑躬耕法星近炤江天畔寂寞衡茅覺

夜明

二御史皆抗疏尉薦故云

平臺行記

聖主能容直臣也

五星順軌火不驕寇降虜讐邊烽銷舜臣五人

同日舉延登受策光 聖朝平臺召見亦何意

疇咨不厭博且勞

聖主清問霽顏色 詹臣抗

對于雲霄禁中語 祕世莫曉君門萬里真岩薶

但傳優容出 天語

君明臣直聞衢謠 唐天

未許排門闔漢代誰當應鼓妖秦王學士時難

見金吾老將何寥寥 嶙峋折檻何足羨 平陵槐

里成蓬蒿窮巷悄然斷車馬流傳盛事心煩囂

老夫未敢歎 秋雨臥聽屋卷三重茅

次韻答項水心宮諭見贈

夕陽亭下車祛祛離筵班馬相躑躅爭看弱葉

墮煙海豈有腐草枝方輿離離莠在娜訾口綿

綿瓜蔓昆吾墟郢水醪清和狼毒蓬池鱸美烹
蟲蛆瀛洲亭子開馬肆柯亭劉井今何如爰絲
居家隨走狗孫弘罷歸仍牧豬烏頭馬角何足
歎頭白始解看殘書齒折何當廢歌笑項稿正
可供糲粗松江蟹肥思魯望蘇臺木落悲靈胥
一籠天地敢跼躄兩九日月窮居諸招邀青山
入庭戶誘引秋水浮堦渠竹閒花下肯相訪預
戒老鶴迎中車

玉堂雙燕行送劉晉卿趙景之兩太史謫
官

玉堂晝煖薰風香雙雙燕尾搖倉琅背飛竝映
銀花榜託宿交棲玳瑁梁感君恩重巢君幕顧
影呢喃前復却何當鳴梧比丹鳳且願銜花效
黃雀啁哳辭歸未忍歸差池掠羽試雙飛風迴
鈴索聲猶在日過花塲候已非珠簾十二秋風
促蘆雪菰煙何處宿明年社日蚤歸來籬口街
泥補君屋

姬太僕墓道歌

華州城南七尺墳渭水縈紆遶墓門劈華巨靈
難深恨竝闕仙掌與招魂冢中碧血爲乳潼扶

養松楸作梁棟秦地爭看下馬陵
雒陽尚說思鄉夢廬山起冢竝
崔巍雍門鼓琴何足哀冢側
正須何點住植花澆酒爲君來

送楊侍御休沐還武林二首

鱸堂盛事記御魚畫繡爭看著
繡衣楚國椒蘭資獻納秦人雞
犬慰鄉閭辰山月白開醪酒酉
水雲深簡洞書見說川源桃萬
樹春來齊發子雲居

其二

清時休澣有餘忠丹地青蒲夢寐中
江漢驚烏

啼夜月沅湘香草哭秋風五溪衣服雲山別
三楚兵車乘廣同莫待還朝方入告
早襄黃閣奏

膚公

侍御武陵樞相之叔也

送任侍御巡按吳中二首

鷹隼秋高刷羽翎爭傳風簡下青冥
遙看牛斗消氛祲先向虛危候德星
螟蟻化爲霜雪氣魚龍不動海波腥
採風願奏吳趨曲驄馬歌謠處聽

其二

帝爲東南減膳殮捐租加賦詔頻煩
夏周七浦

資渠甬單郊三江待討論析木帆檣輸北極扶
桑島激護東門吳宮稻蟹應無恙莫忘飛章慰
至尊

王郎行贈王昺都尉

王郎謫來帝所賓瑤腑璿枝國懿親黃扉近接
天孫館清構遙通婺女津晉陽甲與虜氛惡抗
顏掀髯壓臺閣吳王白頭悔舉事漢相頽顏羞
振落都尉掌宗人府力柱祇今七十仍壯年綠
髮方瞳陸地仙燒丹藥有君臣火好客囊無子
母錢王郎王郎亦癡絕衷腸千卷眉百結滿堂

歌吹慘不歡但爲匈奴猶未滅

題劉宮諭畫三首

春山得春山氣長瀑布奔流幾千丈山僧澣衣
古寺中行人拂面溪橋上噴壑奔雷日夜忙愁
傾銀漢瀉天潢白雲衝斷青山在始信人間有
石梁

右春山觀瀑圖

秋光如水秋天半南山高稜見書案高樓圖史
稱蕭閒下界丹黃自紛亂遠浦維舟傍夕曛兩
翁相對話溪雲知無世事汗君耳樓上書聲聞

不聞

右秋山讀書圖

幽都冰雪夜可有一枝春驛使何當發吾將贈美人

右墨梅

次韻答王芥庵戶部

舊雨悲將別新知樂未皇風雷徒自作弦朔正相望地肺虛靈異天心尚角芒南冠猶唁楚北牖獨歌商閭記輸王粲清評服許將涼風吹灑落白月炤清揚鹿訟嗟牽率雞占笑苦傷山人

聊衣白使者或車黃酒券賒文籍詩場擅鼓簧慙無蔡邕贈執筆重傍徨

文中書啓美人直武英二首時上命侍

臣較正御屏輿圖兼改定琴譜

才子承恩供奉時抽毫長對萬年枝千門萬戶張衡賦盧橘蒲陶李白詞應制大官分酒膳賜金宮女損胭脂君王省識鑾坡事三嘆家聲在鳳池

其二

禁殿深嚴翰墨香地圖琴史卽封章屏開禹跡

圍諸夏譜叶虞弦動四方聚米山川籌朔漠採
風歌曲按伊涼金門尚有台階奏敢倚談諧侍
漢皇

登封歌爲王岑庵贈其尊人

主稱千金客奉酬高歌擊筑燕市頭道心籬下
見黃菊俠氣霜前凌素秋美君長髯不碌碌每
笑腐儒何狗曲秋原俠少輸臂鷹春社兒郎解
分肉嵩山玉屋舊天壇小駐人閒亦未難他時
天子登封日投謁驚看靖長官

牧齋初學集卷第十四

試拈詩集

起戊寅八月盡一年

中秋夜餞馮爾賡使君於城西方閣老園
池感懷敘別賦詩八章時德州盧德水東
萊崔道母及馮五十躋仲俱集

置酒坐廣除白月挂我前纖雲解翳駁萬象吐
澄鮮月駕何方來先炤雙闕巔稍破閣道暗復
向天街圓飛光城南隅亦是尺五天可憐大圓
鏡移置小林泉明童泛玉卮素魄流朱顏嘆息
月中桂芬芳彌歲年

其二

年歲何促迫涼風鳴葛衣分張一尊酒共攬明月暉君如高林隼刷羽秋怒飛我如繞樹鵲三匝睇南枝舉酒向街北天狼角差差熒惑仍在廟卷舌光未衰盈觴不成醉悵然生酒悲崔生獨不飲叩首看少微

其三

少微猶微茫尾箕正動杓漢殿方延登唐麻敢擗裂盧携終絕吭張濬空掉舌玄菟貢仍至盧龍賣未徹築宮種蒲萄橈酒契金屑寄嵐一亭

障何必煩俊傑

馮以邊才推奇嵐道未允

斂容向手版開顏

笑旌節蕭蕭幽易地風勁植素髮誰知千黃金不直一馬骨中坐慄不歡俯仰危涕雪

其四

雪涕亦何爲念我建繫時逝將解符節徒跣偕我馳傾身爲朋友何況君與師在三節不敦相鼠嗟有皮皎皎風烈人千古留須眉斬見魯衛士忍與逆豹私此義久不陳微君誰與規魯連已蹈海平原徒繡絲君過丑父泉爲我重嗟咨

其五

咨嗟思古人今有盧德水逆我檻車中開門納
行李漢吏捕亡命秦相搜客子洶洶蹤跡及盧
生若填耳却笑北海家闔門浪爭死杜亭三閭
屋軒車行至止或有嘉落人定交複壁裏

其六

杜亭主人出居停有兩公

德水祠少陵及杜
十郎顏曰杜亭

一

爲浣花叟一爲陽翟翁十郎不出戶臥陰楊柳
風杜二長羈旅屋茅卷三重人生非鹿麋安得
骨角同指爪旋滅沒有如踏雪鴻巫陽誰筮與
詹尹何去從且醉平原酒豁達開心胸

其七

心胸正鬱陶別君更忡忡君爲希有鳥我如失
負蛩君有一介弟海內稱小馮都諫
元颺君家五十
郎卓犖比敬通一家自師友咳唾生仁風我衰
困無徒不于坎陷中有心各如面昌衛非窮逢
假面難笑啼借足不從容逝將歸故鄉獨身老
蒿蓬衡門塞兩版保此一畝宮

其八

一畝良易保四海將何如清夜不能寐執手臨
前除天王本聖明臣工自睢于鳴集皆鴻鴈

暇豫誰鳥鳥君行登岱宗吊古訪蒲車旗星大
如瓜東井第安居東萊海甸甸將無見巨魚鹽
筴塵宵旰天下供軍儲試看次公論何似仲父
書馮赴山東我聞靈臺占德星出危虛賦詩代
出祖一笑慰首塗

白溝河題張于度屋壁

于度名果中新城人明經篤行左魏

諸公急徵皆主其家

門外喧喧要路津荻簾土銼淨無塵夕陽亭下
頻留客廣柳車中每貯人北寺生還餘我在南
冠死別累君頻臨岐苦語真難忘鄭重車中七

尺身

戊寅九月初三日奉謁少師高陽公於里

第感舊述懷卽席賦詩八章

忽漫摳衣拜此堂心期如夢淚千行更闌尚說
三條燭坐久真慙數仞墻孔思周情新著作禹
糧堯韭舊耕桑明燈促席親函丈秋柝沈沈夜
未央

其二

再鎮危關鎖鑰長一歸奴寇總猖狂心因憂國
渾如醉髻爲論兵半有霜椽筆携將分子姓鞞

刀留取壓文章入郊先問躬耕地簡較秋原幾
樹桑

其三

倉皇出鎮便門東單騎橫穿萬虜中拊手關河
歸舊服側身天地荷成功朝家議論三遺矢社
稷安危一畝宮聞道邊廷饒魏絳早懸金石賞

和戎

時武陵及遼撫方議款
如公酒間拍案歎息

其四

簾櫳即可當儲胥鈴索長疑畏簡書聽事祇堪
容旋馬講堂猶自見街魚能文裴度差相似健

飯張良正不如比較溫公還省事更無僮馬出

門閣

其五

劔眉山鼻戟如鬚生面麒麟可卽圖渭水師臣
爲後輩金城老將作前驅埽清君側誠難事拔
伏遼陽豈廟謨當享何煩三嘆所秋風吾已穩
菰蘆

其六

一從凌水罷兵還三輔三韓戰血殷種落盡收
沙漠部穹廬直抵賀蘭山紛紛嫚語金繒外往

往殘胡障燧閒一綫白溝如帶水煩公臥鎮草

橋關草橋關在高陽

其七

魁三氣象久迷離隱隱寒芒屬尾箕戴斗一星
兼將相朝天數語動華夷滄桑朝市論新局烽
火邊關覆舊棋燈炮漏殘吾欲別河閒早已拂
叅旗

其八

高河水急朔風鳴再拜無言別淚盈海內公今
雙白鬢田閒我亦一蒼生詞林粥飯荒冰署沙

路延登亂火城卅載師門何所效謹傳衣鉢事
歸耕

王師二首

捷書嘗若此振旅竟如何盜賊能逃死百王師
欲止戈彎弓蒲矢在棄甲兕皮多信宿休皇處
吾君候凱歌

其二

老弱猶鵝陳瘡痍自蝘行却看沙草色疑是戰
塵生雇募朝充伍扶携夜扎營歸來見四天子
身是內家兵

九月九日過德州不及登東壁樓於城西
旅店拾紙作詩屬魯瞻留題樓上四首
苦憶東樓上高天在上頭風雷殊不作日月迴
堪愁芳草迷吳會浮雲辯帝州莫令千載後
題作望京樓

其二

苦憶東樓上初飛夏日霜一身容縲纆百口累
刑章複壁蟲絲暗危簷雀語長單車今又過未
死重沾裳

其三

苦憶東樓上盧家送酒來偶拈詩一首暫撥悶
千迴幕鷺愁相語簷花笑不開至今秋夢裡昔
昔與徘徊

其四

苦憶東樓上驅車點筆時魚知釜已熟猿見檻
猶疑敢擬登樓賦聊當絕命辭多君憐芥壁還
與續殘碑

德州城西贈別謝太宰

禾黍秋風古廟旁驅車出餞意何長蒼生自不
忘安石白首誰能論少陽

太白論錢少陽詩云
惟有一翁錢少陽

袖裏討論還啓事尊前談笑亦封章時危道遠
應相望記取臨岐兩鬢霜

汶上道中逢故人

衰林匹馬尚天涯寂寞山城菊自花逐客已非
周太史故人猶是魯朱家心如老鶻迎秋晚身
似賓鴻傍日斜悽愴朱梁舊祠墓汶陽田北看
歸鴉

曲阜道中二首

霜林蕭瑟敝車來宗國蒼茫正可哀泗水秋風
沉漢鼎魯丘落日起秦灰憂時慮與巢鳥切去

國心隨候鴈回惆悵闕宮偏泯滅郊原牧馬總
虺隤

其二

百里平鄉氣鬱葱奎婁近直素王宮人家红柿
茅茨外野店黃花灌莽中日落郊垆瞻魯道霜
清場圃繪幽風齋心午夜渾忘寢肅穆寒燈一
穗紅

崇禎十一年九月十五日謁

孔林越翼日謁

先聖廟恭述一百韻

魯甸千年國尼丘萬代師廟堂周制備秩祀漢

官為林殿遙相竝宮墻儼在斯乾出三代後日

月大明時舊里標歸德新宮叶會期東家雜記云孔廟西

南二百步魯城有門曰歸德世傳四方諸侯慕先聖之德而至多從此門入駿奔如

有事仰止遂吾私歷歷奎婁塾行行濟汶涯天

門開泰岱地脉導淄濰誕睿星精降襄公二十二年冬十

月庚子日先聖生是日有二龍繞徵符斗玉垂

孔子修春秋孝經齋戒面北斗而拜告備于天

有赤虹自上而下化為黃王有刻文孔子卒以

見宋書符瑞志佳城象緯合玄宅鬼神治丘壟

猶堂斧封塋竝鯉思室廬餘結構子貢廬冢室今尚在漢光

武坐孔子講堂顧指子路室也駐蹕想旌旗宋真宗東

謂左右曰此吾大僕之室也北亭上今名駐蹕亭開闢藏元氣衣冠用羽儀

石壇皆禮器瓊甃比宗彝皇覽孔子冢以瓊甃

平異植中梁木殊名辨雜離史記注冢塋中樹

粉柞維離女貞樹護訶荆棘屏恭敬鳥禽知孔子

不生荆棘及刺人草禽鳥不素節金天肅高林

取遺矢顏子冢但無荆棘耳王露滋東瞻日觀近南指帝車移王勃廟碑帝

曜于中階一公云有是泗水秋風下防山夕炤

之祥無位聖人當出網杠雲靄繡紋草葳蕤先聖

麟吐王書于闕里顏氏以繡紋尚鳥習絃歌語林

傳治任悲天香流灌莽地籟響陵陂入孔子墓

噴異香展謁渾如夢低回詎忍辭已上敘拜墓

事之端門何截窠廟東南二里魯城有門曰端魯

道正透迤孔里今真到斯文不在茲平生懷灑

埽一旦拜壇墀祕殿降婁直中階七曜窺周阿

帶陵阜飛閣壓城陴藻井螭頭攫虹梁鳥翼楮

秋陽明象設白道麗罽罽儼若龍蹲在寧云鳳

德衰華冠章甫飾象佩袞衣宜玄聖今當宁羣

賢舊攝齊顏會陪劔履堯禹接鬚眉法象星鈴

吐風雲準角擣偶形閑揖讓屋壁隱金絲頌禮

繆壇樹義文錯院枝先聖手植檜如篆檜身憑

曲几先聖畫像有執王杏幹俯緇帷廊廡丹青

剝觚棱風雨欺戟門徒矗立奎閣半撐支暗網

縈秦籍炎光燎漢碑褒成元始爵籩豆太牢祠

射飲空亭井尊雷亦戲嬉高門猶女謁廟東南

門曰高門齊人遺齊幕自優施入邑朝歌劇初

筵屢舞傲謁墓還宿衍聖公府第公請以女樂

小優歌以侑食力質明如有見每事問於誰几

席頻蠲拭琴書獨嘆噫可能長夜旦終感哲人
姜泯絕登床讖恓惶曳杖辭三家無甲第六族

有餘黎麟野長蒼莽龜山故蔽虧頽宮蟠翠栢

射圃綻紅梨劫火青陽冢少皞陵在魯城西輪

風路寢基魯靈光殿恭王因魯僖驅車良恂悅

立馬重嗟咨此已下感歎於斯文流俗援摺闕

無倫金鏡文奚喪珠囊道漸墮赤書符泰運縹

筆替洪規孔子因曾參孝行漫漶三年學榛蕪

九達達師承譌亥豕文字變侏離玉策爭塗乙

金編互點嗤冥塗紛擿埴錮疾扇淫詖誦法宗

無子奔趨廟有尸謀身庾釜切從政斗筲危已下

雜引家語兩觀疏刀鋸三雍競鼓吹介雞私室

鬪獲鴈野人嘻重錦隣爭覬封弓盜竊闕飲羊

羣狡獠穿狗竝狐疑網漏專車骨託深一足夔

陽街愆雨備火歷過天司俎豆荒文事封疆失

死綏幾年通肅慎何計却萊夷釋甲公徒踞扶

任國俗滴矢矜三寸激弓傳六鈞奇負載非無

策踰溝亦有詞稷禾田賦盡風草竹刑靡復宇

論嘗許歸田數鄆龜作宮還頌閔侑器請觀歆

南服包茅阻東郊牯馬疲詐聞俘赤狄忍見長

黃池去去傷宗國悠悠泣路岐以下自叙生平

家之修容過鄒魯流涕問桓僖皓首懷鉛槧童

年憶佩觿韋編慙未絕丹漆夢相隨劉勰夢執

孔子 亶海乘桴邈十六國春秋魯人從海失津

東行 其說神異魯人尚能言之昌門曳練披憂心

殊悄悄削跡正纍纍雀語紛啁晰鶴歌獨涕洟

無才能擇木有智不如葵累繼吾窮矣迷陽遂

已而人呼為喪狗自笑似蒙俱桑落朋徒在河

流道路彌楚弓亡可得魯寶載安之朽木容雕

飾殘生畏涅緇詠歸聊點爾學稼亦樊遲詎敢

偷懷璧用丹書男子終然守誦圭紀雲徵外史

問日比羣兒龍室藏誰守麟臺筆可追禮亡綿

最近書亂王杯遺河雒紆鈞魯相史晨祠孔

適雒却揆未然孝經春秋既成孔子告備于天

使會子抱河雒事北向春秋河雒凡八十一卷

此其 室惟環堵顏瓢可樂饑願同齊隱士齊宿拜書

詩見南齊臧榮緒傳

濟上逢嘉禾項仲展

相逢無後問乘車執手潛然涕淚初劔外官人

君若此山頭廷尉我何如形容變盡風霜在軀

命偷回肉骨餘南國總看驚鷁羽東門方擬祀

爰居淒風易撼巢枝鳥逆浪偏衝失水魚忽漫

又看成別去低回更復嘆歸與黃花著雨秋英
老紅柿經霜碩果餘長祝清瀾如汶濟郵筒頻
寄一行書

淮上舟中

好在長淮問渡時秋風今日是歸期雨中燈火
揚州近夢裡簫笳楚戍移去國慣如秋燕急還
家慵比暮鴉遲可憐跨下橋邊水淮口東流不
盡悲

高郵道上家人挈舟相迎喜而有作

甓社湖頭暮槳催長風却送布颿開如依拂水

垂楊坐似載西湖明月來綠水茶煙偏蕩漾紅
闌燭影故低回榜人欲奏同舟曲鄰笛斜陽莫
漫哀

十月朔日抵廣陵二首

隋苑荒臺葉不飛竹西歌吹正依稀流螢尚作
蕪城夢跨鶴真同華表歸舊事月明空在眼新
愁水調欲沾衣策籬灣畔孤墳在萬點寒鴉送

落暉

故人顧所建夏國公
勳衛也墓在策籬灣

其二

晚歲生還喜劇悲故人執手淚先垂共嗟餞訣

雷塘路恰是逢迎蜀井期幕裡芙蓉人似玉廣陵

鄭超宗在鄭潛庵使君幕中渡頭楊柳髻如絲市橋殘酒瓜

洲笛明日京江繫我思

硯山詩為華山道開上人賦

雲生搖筆處月駐點經時硯北何人見壺中自
可窺坡陀懸石鼓空翠涌天池舉似華山老蓮
峯倘在茲

送蕭季公歸泰和

無計留君住停杯且一歌江湖鴻鴈闊天地甲
兵多歲晚孤舟別寒空片帆過遠行須吉日期

子慎風波

次韻答金壇于惠生二首

千重地肺一溪雲便闕東窻隔世氛五百年前
逢薊子三層閣上禮茅君曲城已種交梨樹連
石新栽倒薤文咫尺慧車栖隱地滿頭白髮愧
續紛

其二

菰苑誰能先子鳴難將斗石量才情相如錦繡
堪為質子美波瀾獨老成欲折江梅傷歲暮相
思春草喚愁生無緣重酌論文酒自詠殘編啜

菜羹

戊寅除夕偕孟陽守歲時蕭伯玉僑居春

暉園

歸來喜得共茅蓬又餞流年爆竹中繞屋松楸
停早雪緣堤桃李遲春風梅憐分張衝寒白燈
惜團圓破曉紅明日還尋抱關叟以蕭望之
喻伯玉蹇
驢應過小橋東

牧齋初學集卷第十四

牧齋初學集卷第十五

丙舍詩集上

起十二年巳卯
正月盡一年

巳卯元日次除夕韻

衡門兩版啓蒿蓬世事年光在眼中礪水欲寒
經快雪梅花未落受輕風畿南候火千烽赤闕
下祥雲五朵紅邸報傳闕下有五彩
雲見為奴滅之占蚤約鄰翁
占上歲共看幡信到牆東

次前韻簡伯玉

廿年踪跡兩飄蓬忽漫因依昔夢中地近牛鳴
俱隔歲身如鷁羽各驚風鏡奩滅藥鉛華白齋

閤添經蠟炬紅礪戶餘寒人寂歷憶君疑在虎
谿東

次韻答東鄰李孟芳

度阡越陌最情親乙米分甘念我貧七尺艱難
歸故里百金容易買芳鄰爭教麋鹿爲生客互
與松蘿作主人黃閤勳名休借問驪龍領下巴
三巡

立春日喜蕭季公却廻兼示伯玉孟陽次

除夕韻

江天歲晚憶孤蓬却喜回舟似剡中將子能來

如暮雪與君俱到有春風數株嫩蕓催頭白一
握衰顏發酒紅扶杖策驢看我輩畫圖應在谷
林東

壘前韻有寄

世情翻覆總飛蓬萬事輸君高臥中下若溪邊
沽酒雪大寒山畔採茶風春來池草生新綠雨
後庭梅綻小紅遼落江天回首處藝香堂下石
城東

題陸叔平滄桑對奕圖贈稼軒五十初度
去年琅璫燕山頭天荒地老神鬼愁今年燕喜

虞山陽風恬雲暖化日長眼中陵谷有如此何
異揚塵看海水花深西墅列長筵瓜熟東臯會
鄰里高堂擊鼓吹笙竽觥籌交錯絲肉俱蓬山
瀛海挂四壁就中忽見滄桑圖君不見仙家日
月非歲年滄海倏忽成桑田洞中之樂比橘裏
兩翁對奕知誰先一翁斂手欲却顧沉吟猶恐
一著誤一翁超然似晏處目無棋枰手不舉斜
飛殘角未爲促自古英雄少全局局裏滄桑人
不知推枰一笑何榮辱與君酌酒莫逡巡紛紛
朝市又生塵夜露未晞賓旣醉人閒已有爛柯

人

歸來泉歌答金壇于惠生曹汝真

老夫幽繫經歲年歸來舍下新流泉以歸名泉
聊自慰扶杖閒咏歸來篇何緣此泉落人口述
異搜奇到吾友于公作頌如清風曹子歌詩比
瓊玖哦詩奏頌泉之畔真珠瑟瑟相凌亂清音
逸響閒絲竹拂水飛流起天半去年大旱山欲
泐土膏焦枯礪道坼崇朝雲雨長佇望舊井汙
泥空歎息山僮報我泉眼開一縷看從礪底迴
沾濡乍與針芒應渾沸俄隨鋤鑿來人言此泉

神所予天與歸人相勞苦涌出真堪薄醴醪餘
潤猶能長毛羽再拜謝客君毋庸老夫詎敢貪
天功皇天老眼大如許豈爲區區一裸蟲若言
爲我出此泉向來旱涸誰使然偶因鑽火符昔
夢敢擬卓錫稱前緣小桃舒紅落梅白小寒山
中茶欲摘松風徐吹石火新鑪煙輕颺紗帽側
遲君雙屐到漁灣嘯咏新泉古礪閒賸將詩筆
評泉品何似匡山與惠山

晉安徐興公過訪山中有贈

裛衣應杖到松蘿清曉柴門散雀羅古礪寒生

流水靜閒庭客到落花多偉長舊著推中論孝

穆新聲入豔歌

興公子存永能爲豔詩

聞道五車仍挿架

載書何日許重過

海寧張元咭偕許元忠過訪

回首清江古渡邊夕陽戀別又三年人間芳草
生樵徑風定梅花落釣船尊酒細論思舊雨後
堂深坐聽新泉歸與投老終何恨吾黨于今亦
斐然

曲江歌十絕句奉寄香山何相公

風度祠前春草多漁陽鞞鼓復如何請看嶺海

生明月金鏡於今尚不磨

其二

賦成白羽若為工團扇依然在篋中莫為提攜
感移奪君恩容易比秋風

其三

孤榮歲晚見庭梅仙禁會傳紅藥詩庾嶺梅花

千萬樹春風還在向南枝

子壽曾於紫微庭分賦芍藥香山亦有閣

中牡丹詩一時傳誦

其四

偃月堂深仗馬閒一鵬雙兔竝朝班書生漫自

誇前識只恨胡雛軋犖山

雙兔指公與茂苑文相公一鵬蓋有所屬

其五

曲江祠畔乳蕉黃春社雙歸鷺語長莫向水晶

宮裏去月堂無復舊雕梁

昔人名吳興為水晶宮

其六

乘春海鷺又飛迴鷹隼而今已罷猜籥口銜泥

誰省識舊巢仍向玉堂開

其七

梨園曲斷雨淋淋望祭江干淚滿襟還道遺恩

輸越相鐵胎那得比黃金

唐子西云張相廟鐵胎韶人相傳以為明

皇梅時所鑄此詩
專傷茂苑而作

其八

荔子休嗟命不工
緇枝黛葉薦薰風
雕盤省見

京華色五嶠還思進九重

子壽荔枝賦云亭十里兮莫致門九重兮

曷通何斯美之獨遠嗟爾命之不工

其九

開元典冊頌龍池
勃律金城畫詔時
惆悵暮年

雲路永有人煙艇
問殘碑

其十

碣石崢嶸氣未降
帝思風度更無雙
蟬冠右

地頻虛席莫以香山擬曲江

寄督漕張御史二首

匝地烽煙避海漕
普天飛輓湧雲濤
羯奴豈識

敖倉計庾氏徒煩
仰屋勞川瀆效靈
輸萬斛魚

龍銜尾護千艘
至尊肝食臨東渭
鼓吹延君

建節旄

其二

漁陽遼海尚紛拏
粳稻東吳歲運賒
鐵甕雲帆

連析木金堤春水泛
桃花過淮燕賞兼
歌杜抵

潞風光正及瓜一石幾鍾憑奏報
忍令膏血等

泥沙

太和蕭伯玉自白下過訪假館稼軒西園
過從促數且有判年之約忽焉告別驪駒
在門板留不皇分張多感賦詩十章以當
折贈云爾

忽漫竟成別悽惶無奈何已知當飲餞不忍唱
驪歌水國春風晚離亭落日多暮年容鬢在且
莫歎蹉跎

其二

楊柳縈離思桃花綻祖筵不堪臨遠道况值好

春天言別俄分手相留意判年匆匆來又去錯
莫總堪憐

其三

南浦漁灣畔東亭水閣前眼猶牽解纜心欲刺
歸舩離緒多春草愁懷黯夕煙若論疇昔事小
別已千年

其四

婉孌將分袂蒼黃欲灑衣送君傷水綠怨別詛
花飛檣燕違兵氣竿烏見息機白頭波浪裏安
穩布颿歸

其五

吳粵升平地攜家信短蓬
船窻楊柳月帆背杏花
風兵火愁眉外江湖冷
節中羽書頻阻絕停
檝問郵筒

其六

屈指行藏計君其問水濱
東游還有伴西笑更
無人泛艇隨漁婢浮家
逐鴈賓扁舟誰省記南
斗一孤臣

其七

指點歸帆地春浮百畝園
水天爲界限雲樹作

籬樊夜雨蕭齋靜秋聲竹
逕繁相思何處切初
月在東軒

其八

來往無多地經過不速期
蹇驢溪女笑藜杖野
人知應氏樵蘇日龐家
作黍時春盤生菜好節
物重相思

其九

南國無衣賦中原板蕩憂
臨河能不歎蹈海亦
堪羞生計東風菜前期
夜雪舟還須憑快閣極
目攬神州

快閣在太和縣黃魯直詩云快閣東西倚晚晴

目其十

古人嗟贈處斯義在今朝馬肆長宜閉羊裘莫
浪招時清危部黨世難穩漁樵共飽殘年飯音
書慰寂寥

羽林老僧

戒刀中夜響軍持禪杖渾疑削鐵為殺盡羯奴
如殺草老僧原是羽林兒

春夜看真武殿點燈次壁甫韻

春燈萬樹亂雲蘿粧點升平樂事多紺殿香煙
浮水齋朱樓絃管沸巖阿綠堤語笑花閒出促

塵波
席芳塵暗裡過歡飲莫辭今夕醉垂楊已蘸麴

上巳日即事

煙靄空濛歷翠微春郊上巳澹芳菲被除正愛
清流好霑濕何妨急雨飛新柳碧堪浮酒面小
桃紅欲上人衣秉簡士女看相謔芍藥爭教折
贈歸

寒食偕孟陽壁甫山行飯破山寺

肩輿作伴覽新晴綠樹紅芳艷復清過雨煙巒
如拂拭穿雲礧瀑故回縈頻於流水喧中坐儘

向春山好處行記取今年作寒食僧房麥飯午
鐘聲

清明河陽山上冢感歎而作

清明山色滿河陽麥節依然祀享嘗尚有餘生
上丘墓能無老淚灑衣裳村童放學風箏急野
叟迎神社鼓忙莫忘先人遺畝畝太平今日在
江鄉

陽羨相公枉駕山居卽事賦呈四首

閣老行春至山翁上冢回袞衣爭聚看棋局漫
相陪樂飲傾村釀和羹折野梅緣堤桃李樹一

一爲公開

其二

黑頭方壯盛綠野正優游月滿孫弘閣風輕傳
說舟鷗夷看後乘戎馬問前籌側席煩明主
東山自可求

其三

堤柳眠風翠樓花笑日紅穠華欺冷節妖豔仗
天工舟楫浮春水車茵愛晚風暫時憂國淚莫
灑畫橋東

其四

若問山東事將無畏簡書白衣悲命駕紅袖泣
登車甲第功誰奏歌鐘賞尚虛安危有公在一
笑偃蓬廬

山中得范質公司馬削籍報聞將卜居吳
下喜而有作

空山小雨破春寒秋水樓頭正倚闌見說范公
新去國恰如貢禹舊彈冠旋呼鶴使催花信更
埽漁灣整釣竿老屋三間幾兩屐相將同入畫
圖看

其二

春深草碧闔閭城夢裏華胥自玉京枚卜名花
勾舞蝶銓除密樹引流鶯槍旗盃底觀茶戰幟
纛尊前試酒兵莫學鷓鴣夷變名姓五湖蝦菜有
誰爭

四月初六日送春作

今年送春誰最歡纍臣生還棲故園驚心軟紅
付塵夢炤眼柔綠開清尊今年送春誰最惡燕
齊烏鳥巢虜幕壯士白骨枝戰場內人紅袖歸
沙漠人生若不開口笑束縛山岡倩誰弔請看
今日又春歸試問何時再年少牀頭滄酒猶滿

覓屋下新泉似酒清桃笙竹几疎窻好疊石移
花略約成春歸懊惱如何遣半是蕭閒半游宴
清陰午寂卷殘書小院風輕試歌扇憑君莫唱
渭城歌舞蝶啼鶯奈爾何處處落花三月少年
年芳草送春多東風勸爾一杯酒莫以如新怨
白首明年把酒迎早春仍是今年送春叟

拂水競渡曲十首

招屈亭前沅水迴千年魚腹有餘哀兒童不解
靈均苦拂水灘前競渡來

其二

喧呼招屈閭悲傷擊汰揚桴楚些長何事南翁
三戶裡更無人弔楚懷王

其三

五月沅江夾綵旗楚人終古弔三閭吳儂自抱
鷗夷恨權把前潮坐子胥

其四

小小吳舩裊裊龍張鱗掉尾鬪玲瓏吳兒也學
蛟龍樣滅沒翻身高浪中

其五

共駕龍舟戲晚風揚旗鼓浪自爲雄羣兒不省

船頭畫只道青龍見水中

其六

脚踏潮頭口唱歌吳兒從小狎風波自家身命
渾如擲却爲他人數鴨鵝

其七

長鬣三呼作水嬉餘皇出沒弄蛟螭乘潮踏浪
渾閑事難道吳兒遜楚兒

其八

呼噪兒童口尚黃爭標奪采鬪身強須臾鼓罷
龍舟退脫却黃衫便下場

其九

亂流齊進咽通津畫舫垂楊不動塵咫尺白頭
波浪裡水邊人看水中人

其十

船夾蛟螭水怒飛紅闌橋外雨霏微龍舟唱斷
菱歌起日暮安流蕩槳歸

大雨後顧九疇侍郎過訪山中

戲撞頭上擲身難贏得空山一笑看竟日尚餘
憂國淚百年同飽腐儒餐朝賢去似春花盡羯
虜歸如夏雨殘却望西湖垂釣處蒹葭落日炤

漁竿

二哀詩二首

劉司空敬仲

榮嗣曲周人

儒雅風流一俊人，死填牢戶亦前因。
彌留豈意同囚鬼，臯復應須喚獄神。
青簡詩章拋糞土，紫芝眉宇漫灰塵。
精靈料得如精衛，河上年年泣負薪。

傅給事右君

朝佑臨川人

數載梧垣抗疏聲，兩年棘土作書生。
授經粧點窮門面，唱曲消磨苦性情。
右君效黃霸授經於予，每月夜行歌徧獄。

中傲骨可憐緹騎，外芳魂猶喜諍臣。
名長安門外春深草，一片朱殷紅染成。

次韻茅孝若無題二首

曲房砥舍夜珠來，璧月分明入鏡臺。
網戶有情絲罽屢穿簾，無分燕低迴。
眉頭黛簇雙心結，酒面花浮竝口杯。
玉樹作枝君未見，疏窻先亞一株梅。

其二

舊恩今寵故依然，桃葉楊枝盡可憐。
蘭坼芳心因曉露，柳含啼眼為朝煙。
天涯蕩子輕紅粉，日

夕佳人惜翠鈿但得容華竝桃李春風長肯在
花前

荷葉鼎詩

屏石上人讀古人詩云飯炊荷葉鼎遂以意
爲之以荷葉裹米漸而炊之須臾而熟香美
異嘗飯已卯七月過山堂試之戲作詩記其
事

荷葉田田不可整持荷作鏡難炤影但聞楚客
集爲囊豈料山僧炊作鼎長腰玉粒雲子如汲
泉釋米手滌除露荷新葉與包裹松風活火頻

吹噓須臾荷香炊旋熟軟美無煩更淘漉逡巡
應比仙人酒咄嗟不羨豪士粥山僧長烹粥飯
供折脚鐺邊有誰共聊將弱葉戲鼎足更借新
炊喚殘夢老夫飯罷飽撐腸更有吳羹和稻梁
却笑阿師將客粵綠荷包飴趁虛忙

師將游粵西訪劉漁

八月十三夜

高秋雲物映池臺綽約雙娥逐月來爭見青天
飛玉鏡拚將銀漢寫金杯閑愁恰爲清歌緩殘
漏偏教急管催共惜嬋娟又三五相期更刺酒

船回

十四夜

湖山罨畫倚秋空
綠浪紅闌清露中
光瑩地將塵世換
便娟人與月華同
河傾酒面天方醉
漏簇歌心夜未終
信宿西園阻游宴
應知不樂爲車公

車公

石門司成邀宴西園以病不果

十五夜

青天絡角月舒波
銀漢無聲秋露多
自倚白頭還縱酒
偶攜紅袖爲聽歌
兔疑皓魄深藏窟
蟾惜清光旋入河
悵望桂輪今夕滿
莫令尋斧近

姮娥

十六夜

花殘燭暗坐深更
午夜依然是玉京
急雨破除應有意
微雲點綴亦多情
露描翠黛雙蛾重
風拍紅牙一串輕
誰竝姮娥穿月窟
桂枝深處定分明

十八夜

蕭蕭風雨閣樓臺
好是吳孃一曲催
裙汗綠痕都未浣
袖粘紅淚半成灰
可憐狼籍秋光去
誰復招邀月駕來
傳語姮娥亦惆悵
沙才董白

名一時回
重題斷句八首
桂華歌斷碧雲閒
薌澤猶從笑語還
明月西沉
人亦散
只留秋雨伴空山

其二

水雲煙樹半依稀
紅袖雙雙下翠微
更向碧天
歌一曲
無人
不道月中歸

其三

曲宴清歌三五期
離筵恰是月殘時
生憎一片
中秋月
又綰逢迎
又別離

其四

烏鵲驚飛促織催
松街半月影徘徊
期君莫作
今宵月
一墮西巖
不再迴

其五

來如明月去如風
燭滅香銷一番空
何似嫦娥
有行止
長依桂樹
在蟾宮

其六

簇簇雙娥向別杯
當風羅袖欲低迴
回頭却望
秋池水
賸有紅蓮
一朵開

其七

意錢才罷又迷藏馬髻弓腰百樣狂月下風前
難忘却留他別後細思量

其八

霜林紅葉趁裙紅屈指停車十月中安得天公
肯攢簇便禁丹桂作丹楓

聽青琴理弦子

小窻紅燭淚盈盈絃索初調撚撥清彈到西風
黃葉處青琴指下泛秋聲

瑤臺歌

蔣家女兒字瑤臺瑤草瓊花天上來月地雲堦

擅芳澤輕紅澹粉隨塵埃桂梁蘭室盧家婦流
黃機畔長相守自矜容鬢在花前不管年華歸
燕後郎從何處悅傾城鄭重停車問小名未開
繡戶心先許才捲珠簾目已成江城霾風海雲
黑郎逐銀鐺去京國齊女猶傳馬角生

東嶺其上有亭
俗云馬頭生角

燕姬浪說烏頭白
祇憑片語斷

齊女墓
在虞山

姻緣約略歸期好判年春草茫茫如妾思秋衾
昔昔在郎邊相思難避如逃瘧一味文無是良
藥判無棺木待儂開留取衫襦與歡著生憎女
伴笑孤眠不憤旁人說可憐預愁妾老勤臨鏡

暗祝郎歸恰數錢烏啼夜半報郎歸及至歸時
聲影稀三春花鳥成遼闊經歲音書果是非傳
郎三心復兩意賤妾何妨自捐棄又恐人言是
鬼言翻令好事成虛事郎心妾意兩蹉跎似夢
如風可若何拂水山高竝巫峽琴川河水卽天
河天河橫斜昏復曉若比郎心還易了空將求
匹問蠶絲苦恨爲媒憑鳩鳥一朝決絕不繇人
空裏游絲路上塵斗酒雖然付溝水寸腸終自
轉車輪爲郎碎却圍棋局拋擲絲絃罷度曲空
局應知無見期急絃更恐憂思促阿誰傳語到

狂夫河水東西剪得無已分一身非白璧長垂
雙淚抵明珠小窻夜聽青琴說四壁吟蛩助悽
切漏滴銅壺恨正長淚燒紅燭心猶熱我聞瑤
去每沉吟秋燕春花總不禁豈知石闕悲啼處
辜負山枝感悅心却過盧家舊亭館粉紅暈碧
空凌亂檐前楊柳故低垂簾外鸚哥還錯喚聞
君住近斷橋頭莫過西陵古驛樓鑑曲荷花今
已盡濤江風浪使人愁嫁與東家莫酸楚一船
兩槳誰迎汝况復羅敷自有夫難道息媯終不
語好在瑤臺月下時且翻新曲唱歌辭憑將懷

袖三年字也寄迴文一首詩

九日寄華州郭胤伯

江東渭北相望處一鴈南來見汝情書劔可憐
秦逐客衣冠空羨魯諸生梯山每笑邀天博
華真愁與地爭素滄登高安穩未干戈猶傍國
西營

長筵歌爲錢後人稱壽君以九月二十七

日生後余誕辰一日

與君俱是神仙後君方渥顏我皓首與君排日
作生辰長筵齊醉洞庭春君不見昌門甲第煙

流瓦賀客駢闐奉玉斝共羨長雛成大鶴更期
官貴施行馬前堂伐鼓吹笙篴後堂度曲調清
絲玄霜舊藥食雲母玉樹新聲付雪兒又不見
漁灣老人散髮眠寂寞山中草木年計口却添
喂鶴料浮家長傍釣漁船田家瓦盆起爲壽鄰
翁爭席時被肘黃花滿地開金錢霜葉千林點
紅袖人生但解逍遙意大鵬尺鷃何曾異揮金
何處買蕭閒秉燭祇應辨遊戲祝君長把菊花
杯歲歲高歌獻壽詩莫學彭翁年八百繫腰觀
井受人嗤

于廣文挽詩

巷蓋成陰戶屢連餘尊北牖尚依然未應夫子
乘桴去還道先生枕麴眠廷尉門高猶駟馬廣
文官冷自寒壇一盃准擬招魂處只在梅花古
磧邊

送黃二子羽令新都

萬里星橋路之官亦壯哉勒銘看劔閣爲政想
琴臺鳥魄于今在蠶叢自古開經過襄漢地爲
訪臥龍才

其二

知爾彈琴日高齋雪嶺前質成休訟芋絃誦壓
啼鶻花鳥新詩句菖蒲小樣箋好將官製錦同
卷寄吳舩

陳眉公挽詞

怨鶴啼猿共泫然少微星象隱江天買山空復
推支遁蹈海何當識魯連載酒人過楊子宅澆
花自埽秣陵阡雲閒父老如嵩少尚說汾陰望
幸年

歲暮雜懷八首

十畝之間一老民衰遲自分百年身未舒岸柳

應愁我欲放江梅又笑人故紙丹鉛離腐骨虛
窻燈火勘窮塵空山一笑無人會落木蕭蕭下
水濱

其二

殘年樂事總迷離似病如魔我自知謝客且爲
無事飲過江聊作有情癡花間歌好聞鶯處柳
外粧殘墮馬時寂寞紙窻書几夜寒燈一穗雨
如絲

其三

駘蕩春心老更癡渾如中酒落花時天桃贏得

看人面衰柳何妨惹鬢絲小院光風歸緩緩大
堤明月上遲遲早梅又恐經寒勒急倩高樓玉
笛吹

其四

寂歷蓬門啓曙煙層頭簡盡轉蕭然殺青事業
修山史垂白生涯種石田呼婦鳩諳求屋計養
雛鶴算賣文錢閒房日暮松風裡臥聽青琴撥
五絃

其五

續鳧斷鶴枉人謀萬事終輸鬼一籌薇省風催

紅藥晚槐廳響斷白楊秋南部新書古槐夜有

入相者俗謂侯鯖染指慙調鼎任釣驚心笑曲之音聲樹

鈞日暮山陽何處是一聲羌笛起漁舟

其六

藏舟夜半事茫茫北斗南箕盡可傷無復舊交

論罕國空令新詠削山王沙堤路畔看京尹杜詩

府中羅舊尹沙道尚依然唐京尹武庫墳前葬

多宰相私人今取為權戴之壁曰

智囊淵明詩云一旦百歲後相與還北邙智如

其七

於一鼓柁放歌餘我在釣魚灣水即滄浪

卒歲閒門有雀羅流年徂謝意如何看花伴侶

青春少種菜英雄白首多佩劍定須懸舊壠明

珠只合換新歌劇憐渭水垂綸叟未應非熊鬢

已蟠

其八

濠泗居庸王氣全玉衣石馬自千年賊流關陝

如遺跡奴入高麗且息肩誰使犬羊蟠漢地忍

同戎羯戴唐天延登受策安危在贏得菰蘆坦

腹眠

已卯除夕偕孟陽守歲崇德郁振公吳可

黃二先輩俱集

盍簪列炬草堂前
管領梅花又一年
歲晚樵蘇漁釣侶
夜深燈火孝廉船
流光颯沓將過客
世事朦朧欲曙天
却喜鄰僧相慰問
朝來新送佛燈錢

其人

牧齋初學集卷第十五

程